

## **Dxyi'dxyi ra' nin baca'h Jwahn xcweenta ra' cohsa ra' ru nin gue'du gaca ra'**

### *Baluu'yiloh Jesucristu loh Jwahn*

<sup>1</sup> Dee' ra' naa dxyi'dxyi nin badi'hi Dxiohs la'h Jesucristu tin baluu'yi Ñi'hn la'h ra' xmooza Ñi'h xcweenta ra' cohsa ra' nin ze'yahlda gaca. Jesucristu baxe'hla la'h tuhbi xaanjla Ñi'h loh Jwahn tin basagwa' aanjla chi la'h Jwahn garaa ra' bihsi nin rñi' loh dxihtsi rii', <sup>2</sup> ni'chin nin baca'h Jwahn loh dxihtsi rii' garaa xchi'dxyi Dxiohs nin baluu'yi Jesucristu la'h ba, nin basagwa' Ñi'h la'h ba ziga bihsi ra' nin bwa'ha loh ba.

<sup>3</sup> Dichohsa ra' bwiinn ra' nin rusi'dxi xchi'dxyi Dxiohs nin caa loh dxihtsi rii' nee ruzo'badxiahga ra' ban, laasii ze'gadzihn gahxu dxyih nin cha'loh ziga rñi' loh dxihtsi rii'.

### *Jwahn ruca'h dxihtsi loh gagaadzi guido' hasta rii ra' xpwiinn Jesucristu*

<sup>4</sup> Na'h Jwahn, cagaca'hn dxihtsi rii' loh ra' xpwiinn Jesucristu nin rii gagaadzi guiidxyi ra' xteenn Asia. Gulguica'ha guelrbwidxyii sto' xteenn la'h gahca Dxiohs nin naa nnadxyih, cun desde la'n dxyih ra' nin ze'dii'dxi, nee cun nin nahpa dxi', nee cun nin banaaza par tu'pazi, nee xquelruhnntaa'yi cun xquelrbahchidxyii sto' xteenn gagaadzi ra' spíritu nin zuu nez hasta rnabwa'

Dxiohs, <sup>5</sup> nee cun neezaa xquelruhnntaa'yi xquelrbahchidxyii sto' Jesucristu nin ruluu'yi dxyi'dxyi nanchii la'h nu'h, la'h Ñi'h nin mwer babahn za loh bwiinn guuchi; la'h za Ñi'h rnabwa' Ñi'h loh garaa ra' rrehyi ra' nin rii ra' loh guidxyiyuh. Jesucristu rca'hsto' Ñi'h la'h ra' nu'h, nee basiaa Ñi'h la'h ra' nu'h loh duhlda cun llarihn Ñi'h. <sup>6</sup> La'h za Ñi'h bwi'hnn Ñi'h gaca nu'h tuhbi bwiinn roo' tuhbi guiidxyi roo', nee gahca za nu'h bixohza loh Dxiohs Xtaada Ñi'h. ¡Garaatii' ra' bwiinn nahpa guunn lasahca lah Ñi'h nee guinabwa' Ñi'h par tu'pazi! Zi'chi gaca, pwihsi.

<sup>7</sup> ¡Gulgacabwa'! Zi' Jesucristu loh xcahyi, ya garaa ra' bwiinn zwa'haloh ra' ba la'h Ñi'h, hasta bwiinn ra' nin baxaala baldi'h tihxi Ñi'h cun lahnsa zwa'ha za ra' ba la'h Ñi'h; ya garaa ra' bwiinn guidxyiyuh zu'n ra' ba chin gwa'ha ra' ba loh Ñi'h. Zi'chi gaca.

<sup>8</sup> —Na'h naan des galoh nee cun hasta lulchima za ziga naa ra' lehtra A cun Z, —rñi' Daada Dxiohs—. Na'h ziga naan Dxiohs; nabahanahn nnadxyih, cun desde la'n dxyih ra' nin ze'dii'dxila, nee cun nin nahpa dxi'; nee na'hza nin na'pahn guelrnabwa'rooru loh garaatii'.

<sup>9</sup> Na'h Jwahn, naan bwihtsi tu pur nin riachiiza sto'n la'h Jesucristu, nee pur nin naaza nu'h tuhsi loh guelzahcazii, cun ziga chuuza nu'h tuhsi nez loh Dxiohs nee cun ziga gacaza nu'h tuhsi loh guelpaseensi xteenn Jesucristu. Pwihsi chin nuu'huhn loh yuh nin nuu galaayi loh ñihsado' nin laa Patmos, pur nin zegaluu'yi'hn xchi'dxyi Dxiohs, laasii na'h naan nin bwa'haloh dzi'nroo

ra' nin bwi'hnn Jesucristu, <sup>10</sup> pwihsi tuhbi dxyih Duingu bia'hanahn loh xquelrnabwa' Spíritu Saantu xteenn Dxiohs ya bihna'hn nez di'tsihn tuhbi rsiaa'ha ziga xteenn tuhbi trompeta, <sup>11</sup> Nin guñi' loon squii':

—Na'h naan des galohtii'yi nee cun para hasta fihnyi, ziga zi lehtra A cun lehtra Z. Baca'h loh tuhbi chihbru garaa ra' nin gwa'ha loh lu'h, ya guixe'hla lu'hn para xpwi'nn ra'n nin rii loh gahdzi guihtxyi xteenn Asia, o sea par loh guihtxyi Efesu, loh guihtxyi Esmirna, loh guihtxyi Pérgamo, loh guihtxyi Tiatira, loh guihtxyi Sardis, loh guihtxyi Filadelfia, nee cun loh guihtxyi Laodicea.

<sup>12</sup> Chi'chi basia'garii loon tin bwa'hahn nez di'tsihn chyuñin cañi' loon, ya loh bwi'hna'hn zi'chi bwa'hahn gagaadzi gandayehru ohro, <sup>13</sup> ya galaayi gagaadzi gandayehru chi bwa'hahn zuu tuhbi nin naa Llii'n Dxiohs nin naa ndxi'hw, nahcu Ñi'h tuhbi lahdxi nin radzihn hasta yihca ñaa' Ñi'h, nee cun tuhbi cinturohn nin naa ganaalla ohro lli'hidu'h la'ntihxi Ñi'h. <sup>14</sup> Yihca Ñi'h cun dxyichyihca Ñi'h xñah labweh nachiitsin ziga zi dxyihchi lli'hysi, o ziga zi labweh guii'ga; ya bizloh Ñi'h ziga zi bwehla; <sup>15</sup> ya ñaa' Ñi'h rca'bacha'han ziga zi dxi'ba nin laa bronze chin nuu'hun loh dxih; ya rsiaa'ha xteenn xchi'dxyi Ñi'h naan ziga zi chin riuu'bwih zi'hyiroo' ñihsa; <sup>16</sup> ya xlahdu derehchu naa Ñi'h niinloh gahdzi dxih llaa'ndxibaa'; ya rwaa' Ñi'h niinloh tuhbi spahda nin caa duxa garoopa dihtsi ñi'h; ya gaduhbi loh Ñi'h xñahan ziga loh gubihdxyi chin

rzia'ñih gubihdxyi gaduhbi laga'tii'. <sup>17</sup> Chin guya'loh bwa'hahn loh Ñi'h, biaaba'hn loh yuh nez hasta zuu ñaa' Ñi'h ziga zi bwiinn guuchi, chi'chi badzii'ba naa Ñi'h nin naa lahdu derehchu yi'cahn, chi'chi guñi' Ñi'h loon, nah Ñi'h:

—Ayi guidxyihbi lu'h; na'h nin nabahanahn des galoh'tii'yi, nee na'h za nin ba nabahan par tu'pazi. <sup>18</sup> Na'h nin naan nin nabahanahn nnah, guhchi'hn per gubia'garii ba nabahnahn yannah ba nabahnahn par tu'pazi; na'h na'pahn guelrnabwa' loh guelguhchi nee cun loh gabihldxyi za. <sup>19</sup> Ni'chin nin baca'h xcweenta garaa ra' nin bwa'ha lu'h, nin cayahca nnah, neezaa cun nin gue'du ze'yahlda gaca. <sup>20</sup> Dee' naa dxyi'dxyi naga'tsi xteenn gagaadzi dxih llaa'ndxibaa' nin bwa'ha lu'h lahdu derehchu naa'hahn, nee cun xcweenta za gagaadzi gandayehru ohro ra': gagaadzi dxih llaa'ndxibaa' chi naa ra' xaanjla Dxiohs nin rahpa ra' xpwii'nnra'n nin rii loh gagaadzi guihdxyi ra', ya gagaadzi gandayehru ra' nin naa ohro ra' nin bwa'ha lu'h chi naa xpwii'nnra'n nin rii loh gagaadzi za guihdxyi ra' chi.

## 2

*Dxyi'dxyi nin guzee loh ra' xpwiinn Jesucristu nin rii loh guihdxyi Efesu*

<sup>1</sup> Chi'chi nah Ñi'h loon:

—Baca'h dxyi'dxyi ra' rii' loh xaanjla Dxiohs nin rahpa xpwii'nnra'n nin rii loh guihdxyi Efesu: “Squii' rñi' nin caa gahdzi dxih llaa'ndxibaa' naa derehchu Ñi'h, nin ca'nzaa galaayi gagaadzi ra'

gandayehru ohro ra'. <sup>2</sup> Na'h nu'nbwa'n xtsi'n tu cun guelrza'cazii nin ruti'dxiloh tu loh xtsi'n tu nee xa riazahdzi'tsi tu loh xchi'dxyi'hn, nee na'nanzahn ayi rcha'ga tu la'h ra' bwiinn nadxaaba ra', nee ziga la'h tu biuu'nbwa'za tu xcweenta bwiinn ra' nin rñi' naa ra' xpooxtla Dxiohs per ayi naa ra' ba xpwiinn Dxiohs. Sola naann tu naa ra' ba bwiinn rusagui'hi ra'. <sup>3</sup> Pwihsi gwazahdzi'tsi tu loh xchi'dxyi'hn, bwi'hnn tu waanta bati'dxiloh tu guelrza'cazii pur naa tu xpwii'nnra'n, nee ayi bietagueeta tu. <sup>4</sup> Per na'pahn tuhbi guelchiah nin rba'chihn xcweenta tu, laasii ayi ru ruca'h sto' tu na'h ziga baca'sto' tu na'h des galoh. <sup>5</sup> Pwihsi ni'chin gulgaza'sto' tu caa loh guza'bi tu, gulgacha'h ziga nabahan tu tin gulgabia'garii gulgui'hnn ziga gubahan tu des galohtii'yi; sinolan lwehgu gahca gadxi'hyihn la'h tu nee gusia'pitiin xgandayehru tu xnehzan sidela ayi gucha'h tu lligaaba guelruhnn chiohpa sto' nin nuu sto' tu. <sup>6</sup> Per nuu nin ruhnn xnehza tu: ayi riuu'sto' tu nin ruhnn ra' bwiinn nicolaita ra', zi'chi za na'h ayi riuu'sto'n dzi'n nin ruhnn ra' ba. <sup>7</sup> Bwiinn nin zohballaala dxiahga ñi'h chuu ba cha'zi ba dxyi'dxyi ra' nin rñi' Spíritu Saantu xteenn Dxiohs loh ra' xpwii'nnra'n, ya bwiinn ra' nin guunn gahn loh duhlda, zudi'hihn ñinahxi nin caa loh yahga nin naa guelnabahan gahw ra' ba, yahga ñinahxi nin nuu llaa'ndxibaa' hasta nuu Dxiohs.”

*Dxyi'dxyi ra' nin rñi' loh dxihtsi rii' par la'h ra' xpwiinn Jesucristu nin rii' loh guihdxyi Esmirna*

<sup>8</sup> Chi'chi nah Ñi'h loon:

—Baca'h dxyi'dxyi ra' rii' loh xaanjla Dxiohs nin rahpa xpwii'nnra'n nin rii loh guiidxyi nin laa Esmirna: “Na'h nin naan des galohtii'yi nee na'h za nin naan par loh dxyih luulchima ra', na'h nin guhchi'hn per gubia'garii ba nabahan. <sup>9</sup> Na'h na'nnahn xa ruti'dxiloh tu guelrza'cazii nee na'nnzahn gulliaa'hatii' nin nahpa tu nee nicala naa tu nin nuu ziahan xixteen ñi'h loh Dxiohs, nee na'nnzahn nuu nin rñi'yah ra' la'h tu nee rahbi ra' ba naa ra' ba bwiinn Israel per ayi naa ra' ba zi'chi; nin naa ra' ba la'h ra' ba naa ra' ba xpwiinn xquido' bwiinndx-aaba. <sup>10</sup> Ayi guidxyihbi tu loh xcweenta guelrza'cazii nin la'h guhlda guti'dxiloh tu, laasii la'h bwiinndx-aaba gusie'w paalada tu la'n lahtsidxi'ba, tin gacabwa' ba guidu'hun ta guchii tu gwachiisto' tu xchi'dxyi'hn, ya zuti'dxiloh tu guelrza'cazii tsi'h gubihdxyi; gulgasuhchihpa lasto' tu tin chezah dzi'tsi tu loh xchi'dxyi'hn nicala gachi tu, per na'h guni'hihn guelnabahan nin ba naa par tu'pazi la'h tu ziga tuhbi corohna. <sup>11</sup> Nin lu'h xclaa'dzi guzo'badxiahga dxyi'dxyi, guca'hdxiahga ba dxyi'dxyi nin rñi' Spíritu Saantu xteenn Dxiohs loh ra' bwiinn guido' xteenn Dxiohs: nin guunn ra' gahn loh duhlda, ayi xi guun-nee guelguhchi nin raroopa la'h ra' ba.”

*Dxyi'dxyi ra' nin rñi' loh ra' xpwiinn Jesucristu nin rii loh guiidxyi Pérgamo*

<sup>12</sup> Chi'chi nah Ñi'h loon:

—Baca'h dxyi'dxyi ra' rii' loh xaanjla Dxiohs nin rahpa xpwii'nnra'n nin rii loh guiidxyi Pérgamo: “Na'h nin na'pahn spahda nin caa duxa garoopa dihtsi ñi'h rñi'n dxyi'dxyi rii'.

13 Na'h na'nnahn nuu tu loh guihdxyi nin rnabwa' bwiinndxaaba, per zeezahnee dzi'tsi tu xchi'dxyi'hn, ayi cabwe'hesto' tu xchi'dxyi'hn nicala la'n dxyih nin gudxiinn ra' ba la'h Antipas, nin guñi' xcweenta xchi'dxyi'hn, nin gwazahnee za'capa'h xchi'dxyi'hn nin gudxiinn ra' ba hasta rnabwa' bwiinndxaaba, <sup>14</sup> per guyuu' chiohpa-choon xtuhlda tu: loh tu dxa'ga ra' bwiinn ra' nin ruhnn ziga bwi'hnn guehtu Balaam ba guhca cadxyih roo'; la'h ba basi'dxi ba la'h guehtu Balac xa guunn ba tin dxiaaba ra' bwiinn Israel loh duhlda, baluu'yi ba la'h ra' bwiinn Israel tin gahw ra' ba cohsa ra' nin badi'hi guhn ra' ba nez loh dxaan, nee basi'dxi za ba la'h ra' bwiinn Israel guidxa'ga ra' ba chyu chi'h zi gunna'h. <sup>15</sup> Zi'chi gahca za nahpa tu bwiinn ra' nin zeezahnee ra' dxyi'dxyi ra' nin ruluu'yi ra' nin laa nicolaita ra' nin rdxyi'chihn xcweenta ra' ñi'h, <sup>16</sup> ni'chin gulgacha'h sto' tu; sino la'n seguihdu gahca dxie'ldahn tin childxine'hn ni'chi ra' cun spahda nin nuu rwaa'hahn. <sup>17</sup> Nin lu'h xclaa'dzi guzo'badxiahga dxyi'dxyi; guca'dxiahga ba dxyi'dxyi ra' nin rñi' Spíritu Saantu Dxiohs loh ra' xpwiinnra'n: nin guunn gahn loh duhlda, ni'chi ra' gudi'hihn tuhbi lasaa' pahn nin laa manah gahw ra' ba la'n nuucha'yi, nee gudi'hi Zahn tuhbi dxiah labweh la'h bwiinn chi ya loh dxiah labweh chi caa tuhbi lah nacuubi nin ayi chyu nu'nbwa'tii' sola nu'nbwa' nin guica'ha dxiah yi'hn chi lah nin caa loh dxiahyi'hn chi.”

*Dxyi'dxyi ra' nin rñi' loh ra' xpwiinn Jesucristu  
nin ri' loh guihdxyi Tiatira*

## 18 Chi'chi nah Ñi'h loon:

—Baca'h dxyi'dxyi ra' rii' loh xaanjla Dxiohs nin rahpa xpwi'nnra'n nin rii' loh guihdxyi Tiatira: “Squii' guñi' Llii'n Dxiohs, nin naa bizloh ñi'h ziga zi bwehla ya ñaa' Ñi'h ziga zi dxi'ba nin laa bronce nin rca'bacha'h. <sup>19</sup> Na'h la'n naann la garaa ra' nin ruhnn tu; na'nnahn xa rantsii'hi lasaa' tu, nee xa riachiisto' tu xchi'dxyi'hn, nee xa naa xtsi'n tu nee xa riazah dzi'tsi tu, nee na'nnahn cayuhnn tu dzi'n roo' ru nnah loh galoh nin guzo'baloh tu, <sup>20</sup> per nuu tuhbi guelchiah nin rdx'i'chihn pur la'h tu; laasii rcahbi tu riuu' tu loh tuhbi gunna'h nin laa Jezabel. La'h ba rñi' si ba naa ba tuhbi profeta, gunna'h nin rñi' xchi'dxyi Dxiohs, ya pur nin ruluu'yi ba rusagui'hi zi ba la'h ra' xpwi'nnra'n tin rza'bi ra' ba loh ra' dzi'n gubwihlli nee tin rahw za ra' ba cohsa ra' nin rbwih loh dxaan. <sup>21</sup> Na'h la'n gule'za xchih tin gusaguu'dzi sto' ba pur xtuhlda ba, per ayi guclaa'dzitii' ba ñuhnn ban; ayi rbwe'hesto' ba dzi'n gubwihlli nin ruhnn ba. <sup>22</sup> Pwihsi na'h gu'nnahn dxiaaba ba loh lu'hn cun tuhbi gueldxyihdxyi duxa, nee cun garaa ra' nin ruhnee la'h ba dzi'n gubwihlli guti'dxi ra'n ba loh guelrza'cazii duxa sidela ayi gusaguu'dzi sto' ra' ba xcweenta xtsi'n Jezabel. <sup>23</sup> Zidxi'nnahn llii'n ba, ya zi'chi zahcabwa' garaa ra' xpwi'nnra'n na'h nu'nbwa'n garaatii' nin nuu xigaaba tu cun ziga naa sto' tu; ya tuhbigah tu guni'hihn nin rga'ha guica'ha tu ziga naa xtsi'n tuhbigah tu. <sup>24</sup> Per la'h tu garaa ra' ru nin nuu loh guihdxyi Tiatira, nin ra' ayi zeezah loh dxyi'dxyi nin ru-luu'yi Jezabel nee nin ayi za nu'nbwa' tu nin rñi' ra' ba naa dxyi'dxyi rala'n xteenn bwiinndxaaba,



na'h nin stuhbi dzi'n ayi rudzi'ba'hn yihca nin naa tuhbi dxi'h xtsi'n tu. <sup>25</sup> Mas gulgahpa dzi'tsi xchi'dxyi'hn nin nahpa tu hastayi chin dxie'ldahn stuhbi, <sup>26</sup> ya bwiinn ra' nin guunn gahn loh duhlda nee chezah tu ziga xclaa'dzihn hasta la'n dxih nin cha'loh guidxyiyuh, zudi'hihn guelrnabwa' la'h ra' ba tin guinabwa' ra' ba loh ra' naciohn ra'. <sup>27</sup> Pwihsi ziga bani'hi Xtaa'dahn guelrnabwa' na'h, zudi'hihn guelrnabwa' la'h ra' ba tin guinabwa' ra' ba loh ra' garaa ra' bwiinn guidxyiyuh, nee guunn ra' za ba guelguxchisi xcweenta ra' ba ziga zi cun tuhbi bahra dxi'ba ziga ruhn nin ruhnncha'yi guihsu bwehn, rutaa'ha ra' ba garaa ra' guihsu nin ayi gallu'yi. <sup>28</sup> Zudi'hi Zahn dxih nin ri' rsiiyido' la'h ra' ba. <sup>29</sup> Nin ayi ñie'w dxiahga ñi'h, guzo'badxiahga ra' ba nin rñi' Spíritu Saantu Dxiohs loh ra' xpwiinnra'n.”

### 3

*Dxyi'dxyi nin rñi' loh ra' xpwiinn Jesucristu nin rii loh guihdxyi Sardis*

<sup>1</sup> Chi'chi nah Ñi'h loon:

—Baca'h dxyi'dxyi ra' rii' loh xaanjla Dxiohs nin rahpa xpwiinnra'n nin rii loh guihdxyi Sardis: “Zi'chi nah nin rahpa gagaadzi Spíritu xteenn Dxiohs nee cun gagaadzi dxih llaa'ndxibaa' loon: Na'h naannloon garaa ra' dzi'n nin ruhnn tu, nee naann Zahn naa tu ziga tuhbi bwiinn guuchi, ayi ru guunn tu xtsi'na'hn nicala za'bi dxyi'dxyi nabahan tu. <sup>2</sup> Gulgati'chi baca'lda loh tu nee gulguiñah loh ra' xcweenta xchi'dxyi'hn nin amwerla ñichiloh la'n lasto' tu, pwihsi na'h caywa'haloon

garaa nin ruhnn tu nin ayi naa bwen nez delanta loh Daada Dxiohs xte'nnahn. <sup>3</sup> Gulgaza'sto' tu dxyi'dxyi ra' nin basi'dxi tu cun baca'dxiahga tu, ni'chin gulgazo'badxiahga dxyi'dxyi gulgacha'h ziga nabahan tu loh duhlda, per sidela ayi gucha'h tu xmohda tu, zadzihna'hn nez loh tu ziga tuhbi guba'n nin ayi gaann tu xohra gadzihna'hn nez loh tu. <sup>4</sup> Per nahpa tu loh guiidxyi Sardis paal-daa ra' bwiinn nin nayaa nin nagahdxi sa'bi ra' loh duhlda, ya la'h ra' bwiinn ra' chi zahcu ra' ba lahdxi labweh tin sahnee ra' ba na'h nez llaa'ndxibaa' laasii zi'chi ruhnn tucabri la'h ra' ba. <sup>5</sup> Nin guunn ra' gahn loh duhlda, ni'chi ra' gacu lahdxi labweh, nee ayi gura'hn lah bwiinn ra' chi loh chihbru nin caa lah ra' bwiinn nin guibahan-nee la'h Dxiohs par tu'pazi nee ziñi'n nez delanta loh Xtaa'dahn cun nez loh za ra' xaanjla Ñi'h bwiinn ra' rii' naa ra' xpwii'nnra'n. <sup>6</sup> Bwiinn ra' nin zohballaala dxiahga ra' ñi'h guzo'badxiahga ra' ba dxyi'dxyi ra' nin rñi' Spíritu Saantu xteenn Dxiohs loh ra' xpwii'nnra'n.”

*Dxyi'dxyi ra' nin rñi' loh ra' xpwiinn Jesucristu nin rii loh guiidxyi Filadelfia*

<sup>7</sup> Chi'chi nah Ñi'h loon:

—Baca'h dxyi'dxyi rii' loh xaanjla Dxiohs nin rahpa xpwii'nnra'n nin rii loh guiidxyi Filadelfia: “Squii' rñi' nin banayaa par tu'pazi, nin guchii naa xchi'dxyi Ñi'h, nin nahpa xchiahayi guehtu Davihd; la'h Ñi'h chin ruxaala Ñi'h ayi nin tuhbi nin guunn gahn gusie'w hasta ruxaala Ñi'h, nee chin rusie'w Ñi'hn ayi za nin guunn gahn guxaala hasta rusie'w Ñi'h. <sup>8</sup> Na'h na'nnahn garaa ra'

nin ruhnn tu. Baxaa'lahn tuhbi rwaa' lee' nez delanta loh tu nin ayi guunn chyü chi'h zi gahn dxie'w; pwihsi nicala gullia'yi'hn naa xjweersi tu per bazo'badxiahga tu xchi'dxyi'hn nee ayi rbwe'hesto' tun, <sup>9</sup> pwihsi zwa'ha tu cuun nin gusahca'hn la'h ra' bwiinn ra' nin zeena'hla la'h bwiinn dxaaba; la'h ra' nin rñi'zi ra' naa ra' bwiinn Israel, per ayi naa ra' ban; rusagui'hi ra' ba la'h ra' bwiinn. Na'h zu'nnpa'caan dxie'biiga ra' ba nez loh tu tin guzu'nllihbi ra' ba nez loh tu tin gacabwa' ra' ba na'h ruca'hsto'n la'h tu, <sup>10</sup> laasii ayi rria'gahn tu loh xchi'dxyi'hn, ni'chin na'h zahcane'hn la'h tu chin guti'dxiloh tu guelza'cazii, nee zuti'dxiloh za garaa ra' bwiinn guidxyiyuh guelza'cazii tin guidu'hun cuun pa'ca nin naa ra' bwiinn za'ca loh ra' bwiinn guidxyiyuh ra'. <sup>11</sup> Na'h ayi gacata'h ru dxie'ldahn; bwa'ha dzi'tsi cun xchi'dxyi'hn nin nahpa tu tin ayi chyulla cwe'hellu'hu nin bani'hihn guca'ha tu. <sup>12</sup> Bwiinn ra' nin guunn gahn loh duhlda, na'h gu'nnahn gaca ra' ba ziga tuhbi piyahri nin nuu hasta naa xquido' Xtaa'dahn, nee ayi chuu dxyih nin garia'h ra' ba ri'chi; locah ra' ba guca'hn nin naa lah Dxiohs Xtaa'dahn neezaa lah gui'dxyi nin laa Jerusalehn nacuubi nin dxiehta llaa'ndxibaa' hasta nuu Dxiohs, nee zuca'h zahn laan locah ra' ba laan nin naa nacuubi laasii naa ra' ba xpwiinnra'n. <sup>13</sup> Bwiinn nin zohba dxiahga ñi'h guzo'badxiahga ba nin rñi' Spíritu Saantu Dxiohs loh ra' xpwiinnra'n.”

*Dxyi'dxyi ra' nin rñi' loh ra' xpwiinn Jesucristu ra' nin rii loh gui'dxyi Laodicea*

<sup>14</sup> Chi'chi nah Ñi'h loon:

—Baca'h dxyi'dxyi ra' rii' loh xaanjla Dxiohs nin rahpa xpwii'nnra'n nin rii loh guihdxyi Laodicea: “Squii' rñi' nin ayi rusagui'hi, nin rñi' ganaalla dxyi'dxyi guchii, nin gulahchixchih garaa nin bwi'hnn Dxiohs lligaaba gacacha'yi. <sup>15</sup> Na'h na'nnahn garaa nin naa xtsi'n tu; ayi zeezah za'ca tu loh xchi'dxyi'hn, ayi za rbwe'hesto' tun, jmas cha'yi ñahzanee za'ca tun o ñibwe'hesto' tun! <sup>16</sup> Per nnah naa tu ziga zi ñihsa nadxa'ha; ayi za naa tu nin ziga ñihsa nahlda, nin ayi za naa tu ziga ñihsa lda'h, ni'chin zabwe'he rwaa'hahn la'h tu. <sup>17</sup> Pwihsi la'h tu rñi' tu: Ricu'hn, nee bwen gahca riuu'huhn; ayi xi ria'dxi'hn, per la'h tu ayi rahcabwa' tu naa tu ziga tuhbi bwiinn nin ayi xi nahpatii'; naa tu ziga tuhbi bwiinn gubiin, tuhbi bwiinn prohbi duxa, tuhbi bwiinn nin ayi riin loh ñi'h, nee naa tu ziga tuhbi bwiinn nin zuu lla'teh par la'h Dxiohs. <sup>18</sup> Ni'chin nin rñi'n loh tu gulsi' ohro loon, ohro nin ba gudii'dxi loh dxih bu'hu tin zi'chi gaca tu ziga tuhbi ricu pa'caa, nee loo Zahn si' tu lahdxi labweh nachitsi nin gacu tu tin xtuhyi zuu lla'teh tu; nee guni'hi Zahn rramwehdxii nin chuu baloh tu tin gwa'ha za'ca tu. <sup>19</sup> Na'h rñi'ne'hn cun rzuh za'ca'hn la'h garaa ra' bwiinn ra' nin ruca'hsto'n ni'chin nin rñi'n loh tu nahpa chu'gui'w sto' tu guunn tu xtsi'na'hn, nee gulgacha'h lligaaba dxaaba nin nuu sto' tu. <sup>20</sup> Gulguia'ha, na'h la'n zuu rwaa' lee' xteenn sto' tu, cabwiidxihn, per sidela chyulla tuhbi tu dxihn cañi'n, guxaala bwiinn chi rwaa' lee' xteenn lasto' ba, tin guunn yiidzihn lasto' bwiinn chi tin gacane'hn bwiinn chi guibahan za'ca ba nez loon, <sup>21</sup> ya bwiinn nin ruhnn gahn loh duhlda,

la'h bwiinn chi gudi'hihn guinabwa'nee ba na'h llaa'ndxibaa', ziga bwi'hna'hn gahn loh duhlda ni'chin nin guzo'ba'hn hasta rnabwa' Xtaa'dahn llaa'ndxibaa'. <sup>22</sup> Bwiinn nin zohba llaala dxiahga ñi'h guzo'badxiahga ra' ba dxyi'dxyi ra' nin rñi' Spíritu Saantu Dxiohs loh ra' xpwii'nna'n."

## 4

### *Bwa'ha Jwahn billaala rwaa' lee' xteenn dxibaa'*

<sup>1</sup> Chin guya'loh baca'hn dxyi'dxyi ra' nin gunabwa' Ñi'h baca'hn, chi'chi guteesa loon nez dxibaa', bwa'hahn zohbillaala rwaa' ziga tuhbi yuu' nez dxibaa', chi'chi guñi' tuhbi rsiaa'ha loon, rsiaa'ha chi naan ziga rsiaa'ha xteenn tuhbi trompeta nin bihn dxiaagahn galoh, nah rsiaa'ha chi loon:

—Gucah rii', tin gulu'yi'hn yi'h garaa' ra' nin chuu ru gaca chin tuulla gaca cohsa ra' rii'.

<sup>2</sup> Ya chi'chi bia'hanahn loh guelrnabwa' xteenn Spíritu Saantu, ya bwa'hahn tuhbi yahgaxiyyi roo' llaa'ndxibaa' hasta rbwih ra' nin rnabwa' llaa'ndxibaa', ya loh yahgaxiyyi chi zohba nin rnabwa' llaa'ndxibaa'. <sup>3</sup> Ya nin zohba loh yahgaxiyyi chi rñah ni'chi ziga tuhbi dxiah nin rbwibwehla nin laa jaspe o nin laa za cornalina, ya gadiidxi yahgaxiyyi chi nuu tuhbi guundzihin nin rca'bacha'h duxa ziga zi tuhbi dxiah nin laa esmeralda, <sup>4</sup> ya gadiidxi yahgaxiyyi rii' bwa'hahn za galda bitapa yahgaxiyyi ra' nin zohba galda bitapa bwiinnguuhla ra', nahcu ra' ba ganaalla lahdxi labweh ya nuu tuhbigah ra' corona ohro yihca ra' ba, <sup>5</sup> ya nez loh yahgaxiyyi roo' chi ri'chi rre'h du'hdxih ra' nin naa du'hdxih nin rre'h

chin rdxi'ñaa', ya nez loh za yahgaxiiyi roo' chi cacadxih gahdzi bwehla nin naa gahdzi spíritu xteenn Dxiohs, <sup>6</sup> cun nez lohghacaza yahgaxiiyi roo' chi nuu ñihsado' nin rñah ziga zi dxiawahan. Nee cun galaayiza yahgaxiiyi roo' chi cun gadiidxin rii ra' tahpa maan ra' nin nuu bizloh ra' ñi'h gadiidxitii' ra' ma tantu nez delanta ziga nez dihtsi ra' za ma. <sup>7</sup> Nin naa mwer tuhbi maan ra' chi naa tuhbi bwe'dzi; ya nin raroopa maan chi naa ziga tuhbi guun; ya nin riohna chi naa ziga loh tuhbi ndxi'hw; ya nin radaapa maan chi naa ziga tuhbi bisiah nin rzuh. <sup>8</sup> Ya gadaapa ra' maan ra' chi tuhbigah ra' ma zohba xo'pagah xiiyi ra' ma, ya gaduhbitii' tihxi ra' ma nuu bizloh ra' ma; nee dxyih-nague'la ayi rbweeza cañi' ra' ma:

Saantu, saantu, saantu naa Daada Dxiohs nin nahpa guelrnabwa' roo', nin nuu des galohtii'yi, nin nuu nnah, cun nin chuu par tu'pazi.

<sup>9</sup> Ya chin ruhnn lasahca ra' gadapa maan ra' chi cun ruzu'nllihbi ra' ma cun rudi'hi ra' ma guelzuxchilli loh nin zohba loh yahgaxiiyi nin ba rnabwa' par tu'pazi, <sup>10</sup> ya gagalda bitapa ra' bwiinn guuhla ra' ruzu'nllihbi ra' ba nez loh nin ba rnabwa' par tu'pazi cun raann ra' ba la'h Ñi'h, ya ruzuhcaa ra' ba xcurohn ra' ba hasta zuu xahgaxiiyi Ñi'h, cun rahbiza ra' ba:

<sup>11</sup> Daada Dxiohs Xtaada nu, Yu'bi pa'ca lu'h rga'ha guunnlasahca bwiinn lah lu'h cun guzu'nllihbi ra' ba loh lu'h cun guica'ha za lu'h garaa guelrnabwa'

laasii Yu'bilu'h bwi'hnncha'yi lu'h garaatii' ra' nin nuu nnah pur xigaaba lu'h guhca ra'n

ni'chin nin gurihxchih ra'n.

## 5

### *Tuhbi chihbru cun nin naa Xi'hyi Dxiohs*

<sup>1</sup> Chi'chi na'h Jwahn bwa'hahn loh naa derehchu nin zohba loh yahgaxiyyi roo' nin naa trono, nuu tuhbi dxihtsi nin bidu'bi, caa lehtra loon cun nez dihtsin ya ñie'wun cun gahdzi sehyu, <sup>2</sup> chi'chi bwa'hahn loh tuhbi xaanjla Dxiohs nin nahpa ziroo' jweersi, chi'chi guñi' jweersi aanjla chi rahbi ba:

—¿Chyu ni'ca ruhnn tucahri guxaala loh dxihtsi rii' nee chi'llu za ni'chi sehyu nin caa loh dxihtsi rii'?

<sup>3</sup> Per nin llaa'ndxibaa' nin loh guidxyiyuh ayi bidxeela nin ñuxaala loh dxihtsi chi o mas ñwa'ha si ba loh dxihtsi chi, <sup>4</sup> chi'chi guzo'baloh ru'n duuxa'hn laasii ayi bidxeela nin tuhbi nin ruhnn tucahri ñixaala loh dxihtsi chi tin ñu'lda ba loh dxihtsi chi, o mas ñwa'ha za ba loh dxihtsi chi, <sup>5</sup> chi'chi guñi' tuhbi bwiinn guuhla loon, nah ba:

—Ayi ru gu'n lu'h; la'h bwe'dzi nin naa xahgado' guehtu Judah cun xahgado' guehtu Davihd, la'h Ñi'h bwi'hnn gahn loh guelguhchi ni'chin nnah la'h Ñi'h ruhnn tucahri guxaala loh dxihtsi ca cun chi'llu Ñi'h gagaadzi sehyu nin caa dihtsi ca.

<sup>6</sup> Ya chi'chi galaayi yahgaxiyyi roo' nin naa tronu cun nez loh ra' gadaapa ra' maan ra' nin rii gadiidxi tronu chi cun galaayi bwiinn guuhla ra', bwa'hahn zuu tuhbi nin naa Xi'hyi Dxiohs, nicala rluu'yi sehn ra' nin guhchi Ñi'h ziga lli'hyi nin rbahchi guhn ra' bwiinn loh Dxiohs; zohba gahdzi xcachchu Ñi'h neezaa nuu gahdzi ba'loh Ñi'h nin

naa gahdzi Spíritu xteenn Dxiohs nin ruxe'hla Ñi'h nez gaduhbitii' loh guidxyiyuh, <sup>7</sup> ya chi'chi gwabiiga Ñi'h tin guca'ha Ñi'h dxihtsi chi lahdu derehchu naa nin zohba loh yahgaxiiyi roo' nin naa tronu nez dxibaa'. <sup>8</sup> Ya chin guya'loh guna'zu Ñi'h chihbru chi, chi'chi gadaapa maan nin rii hasta zohba yahgaxiiyi roo' dxibaa' cun gagaldabi tapa ra' bwiinn guuhla bazu'nllihbi ra' ba nez delanta loh Xi'hyi Dxiohs, tin tuhbigah ra' bwiinn guuhla chi nuu tuhbigah harpa naa ra' ba nee cun dxi'ba ohro ra' nin naa ziga bisihn guxa'hla, ya guxa'hla rii' naa guelrbwihdxyi-guelrnaaba xteenn ra' garaa ra' xpwiinn Dxiohs la'h Ñi'h, <sup>9</sup> ya cayu'lda za ra' ba tuhbi dxyi'dxyi cuubi nin rahbi ra' ba squii':

Lasahca duxa Yu'bilu'h pur nin guna'zu lu'hn, nee laasii Yu'bi za lu'h naa lu'h nin guhchi loh cruhzi,

ya cun llarihn lu'h gudxihlli lu'h xcweenta bwiinn ra' nin naa xpwiinn Dxiohs.

Bwiinn garaa lahta ra' nin rñi' guriin-guriin dxyi'zah, bwiinn nin naa ra' guriin-guriin guihdxyi cun nin rii ra' guriin-guriin lahdxyi bwiinn,

<sup>10</sup> nee badi'hi lu'h gaca ra' ba rrehyi cun bixohza nez loh Dxiohs,

ya guinabwa' ra' ba nez loh ra' bwiinn guidxyiyuh.

<sup>11</sup> Ya chi'chi bwa'hahn, nee bihna'hn rsiaa'ha ziga cañi' ziahan roo' ra' aanjla gadiidxi hasta zohba yahgaxiiyi roo' dxibaa' hasta bwih nin rnabwa' nez dxibaa', neezaa rsiaa'ha gadaapa



ra' maan ra' nin rii hasta zohba yahgaxiyyi roo' llaa'ndxibaa' chi, neezaa rsiaa'ha ra' bwiinn guuhla, per nin ayi za nuu guilaaba ra' xaanjla Dxiohs nin rii' ri'chi laasii ziahan duxa naa ra' ba, pur miyohn naa ra' ba, <sup>12</sup> ya jweersi roo' cañi' ra' ba squii':

Lasahca duxa Xi'hyi Dxiohs nin guhchi loh cruhzi,  
ni'chi ca'ha Ñi'h guelrnabwa' duxa cun  
guelrahpa duxa,

cun guelnaann duxa, guel milahgru;

neezaa gachidi'hnn lasahca nu'h lah Ñi'h,  
gazu'nllihbi nu'h nez loh Ñi'h gaann nu'h  
Ñi'h,

gadi'hi za nu'h guelzuxchiilli loh Ñi'h.

<sup>13</sup> Chi'chi bihn dxiaagahn rsiaa'ha garaa ra' nin gulahchixchih Dxiohs nez dxibaa' cun loh guidxyiyuh nee cun la'n gueeta loh guidxyiyuh nee cun loh ñihsado', bihn dxiaagahn cañi' ra' ni'chi squii':

Nin zohba loh yahgaxiyyi nin naa trohnu dxibaa',  
neezaa loh nin naa Xi'hyi Dxiohs, la'h chi'h zi Ñi'h  
lasahca duxa Ñi'h,

gachidi'hnn lasahca nu'h la'h Ñi'h, gazu'nllihbi  
nu'h nez loh Ñi'h la'h za Ñi'h gaann nu'h,

nee gahbi za nu'h barnabwa' Ñi'h par tu'pazi.

<sup>14</sup> Ya gadaapa ra' maan ra' nin rii hasta zohba yahgaxiyyi xteenn Dxiohs nez dxibaa' rahbi ra' squii':

Zi'chi gaca, pwihsi.

Ya gagalda bitapa ra' bwiinn guuhla bazu'nllihbi ra' nez loh nin ba nabahan par tu'pazi, tin gaann ra' ba la'h Ñi'h.

## 6

### *Gagaadzi ra' sehyu*

<sup>1</sup> Ya seguihdu bwa'hahn loh nin naa Xi'hyi Dxiohs baxaala Ñi'h loh tuhbi ra' sehyu, ya bihn dxiaagahn guñi' tuhbi ra' gadaapa ra' maan nin nuu hasta zohba yahgaxiiyi roo' dxibaa', per chin guñi' ma naa rsiaa'ha ma ziga chin rñi' guzi'w, nah ma:

—Gudaa' tin bwa'ha.

<sup>2</sup> Ya chi'chi bwa'hahn tuhbi maan gway labweh; ya nin zohba dihtsi ma nuu tuhbi arcu nin ruca'h bahza naa ni'chi, ya guca'ha za ba tuhbi corohna tin biria'h ba cayuhnn ba gahn nee tin guunn za ba gahn chyu chi'h zi.

<sup>3</sup> Chin gudxi'llu Xi'hyi Dxiohs nin raroopa sehyu, bihn dxiaagazahn guñi' nin raroopa maan nin nuu hasta zohba yahgaxiiyi roo' dxibaa', nah ma loon:

—Gudaa' tin bwa'ha.

<sup>4</sup> Chi'chi bwa'hahn tuhbi maan gwayi xña, ya nin zohba dihtsi ma guca'ha guelrnabwa' tin guziaa'tii ba guelrbwihdxyii sto' loh guidxyiyuh tin gudxiinn lasaa' ra' bwiinn ziga tuhbi ziga stuhbi ra' ba, ya guca'ha ba tuhbi spahda roo'.

<sup>5</sup> Chin gudxi'llu Xi'hyi Dxiohs nin riohna sehyu, bihn dxiaagahn guñi' nin riohna maan nin nuu hasta zohba yahgaxiiyi roo' dxibaa', nah ma loon:

—Gudaa' tin gwa'ha lu'h.

Chi'chi bwa'hahn tuhbi maan gway nagaasa, ya nin zohba dihtsi ma nuu tuhbi balansa naa ni'chi, <sup>6</sup> ya bihn dxiaagahn tuhbi rsiaa'ha galaayi ra' gadaapa ra' maan ra' nin rii hasta zuu xagaxiyyi Dxiohs dxibaa', nah rsiaa'ha chi:

—Sola tuhbi dxi'h kihlu llooba guica'ha lu'h dela guunn lu'h dzi'n tuhbi dxyih, nee cun chohnna kihlu cebada guica'ha lu'h guunn lu'h dzi'n tuhbi dxyih, per ayi guxi'n lu'h vihnnu cun nsehchi.

<sup>7</sup> Ya chin gudxi'llu Xi'hyi Dxiohs nin radaapa sehyu, chi'chi bihn dxiaagahn guñi' radaapa maan nin nuu hasta zohba yahgaxiyyi roo' dxibaa', nah ma loon:

—Gudaa' tin gwa'ha lu'h.

<sup>8</sup> Chi'chi bwa'hahn tuhbi maan gwayi guhtsi, ya nin zohba dihtsi ma laa guelguhchi, ya dihtsi guelguhchi rii'na'hla nin rnabwa' gabihldxyi, ya guca'ha ni'chi guelrnabwa' loh lacwarta parte guidxyiyuh tin chiinn ni'chi la'h ra' bwiinn cun spahda, cun guelgubihn, cun gueldxyihdxyi, cun gahw maan duxa ra' nin nuu loh dahan la'h ra' bwiinn.

<sup>9</sup> Ya chin gudxi'llu Xi'hyi Dxiohs loh sehyu nin rahca ga'yu, ya bwa'hahn hasta nuu bacu'ga dxiah xteenn Dxiohs nez dxibaa' rii ra' xaalma ra' bwiinn ra' nin guhchi nin gwachiisto' ra' ñi'h xchi'dxyi Dxiohs, neezaa pur nin baluu'yi ra' ba xchi'dxyi Dxiohs. <sup>10</sup> Bwiinn ra' rii' cañi' ra' ba jweersi roo' rahbi ra' ba:

—Daada Dxiohs nin naa saantu cun nin naa guchii pa'h, ¿cuucayi cha'loh guunn Yu'bilu'h guelguxchisi tin chiilli ra' bwiinn guidxyiyuh xcweenta nin gudxiinn ra' ba la'h nu?

11 Chi'chi badi'hi Ñi'h lahdxi labweh guhta ra' ba, ya rahbi Ñi'h loh ra' ba guzi'laa'dzi ra' ba za balaqui'hn la'h chi nin gasaa' ru lasaa' ra' ba nin ruluu'yi xchi'dxyi Dxiohs, nin chuu ru gadxiinn ra' bwiinn guidxyiyuh ziga badxiinn ra' ba guehtu bwiinn ra' nin guhchi pur xchi'dxyi Dxiohs des ca chiempa roo'.

12 Bwa'ha Zahn chin gudxi'llu Xi'hyi Dxiohs loh sehyu nin rahca xo'pa, chi'chi guhca tuhbi luh roo' duuxa, ya gubihdxyi biahcan ziga tuhbi lahdxi nagaasa bu'hu, ya bwe'hw biahcan ziga culohr xteenn rihn, <sup>13</sup> ya dxih llaa'ndxibaa' biaaba ra'n loh guidxyiyuh ziga zi chin ruza'h yahga ñiigu la'h ra' ñiigu chin rusiaabatii' bwih la'h ra'n, <sup>14</sup> ya dxibaa' guñihchilohon ziga zi tuhbi dxihtsi nin radiaa'ha, ya garaa ra' dahan ra' cun yuh ra' nin rii loh ñihsado' biñi'bi ra'n, cun bidxa'h xlahta ra'n, <sup>15</sup> ya garaa ra' bwiinn guidxyiyuh; bwiinn ra' nin rnabwa' ra', neezaa ra' bwiinn dzi'baloh ra' ziga capitahn, bwiinn rricu ra', bwiinn nadxi-ipalaa'dzi ra' neezaa mooza ra' nin gudoo'tii' cun bwiinn ra' nin gula'h loh guelmooza, gwacuula'n ra' ba la'n cwehva ra' cun la'n dxiah roo' ra' xteenn dahan ra', <sup>16</sup> ya rahbi ra' ba loh ra' dahan ra' cun loh ra' dxiah ltah ra':

—Guldxiaaba yihca nu nee gulchuula'n la'h nu loh nin zohba loh yahgaxiyyi roo' llaa'ndxibaa', nee cun loh guelguxchisi duxa nin guni'hi Xi'hyi Dxiohs, <sup>17</sup> laasii la'h dxyih xteenn xquelguxchisi Ñi'h badzihn; ¿chyu ni'ca zahca suh nez loh Ñi'h?

## 7

*Tuhbi gaywa'h chywa'h bitapa mihi ra' bwiinn*

*Israel*

<sup>1</sup> Ya chi'chiyi bwa'hahn loh tahpa xaanjla Dxiohs nin zuu gadaapa xchihn guidxyiyuh, cagacwe'za ra' aanjla ra' chi loh gadaapa xnehza bwih xteenn guidxyiyuh tin ayi xi bwih suu loh guidxyiyuh cun loh ñihsado', nee nin tuhbi za loh ra' yahga, <sup>2</sup> ya bwa'hahn stuhbi xaanjla Dxiohs nin biinloh nez lahdu rtahn gubihdxyi, ya ca'ha aanjla chi sehyu xteenn Yu'bi Dxiohs nin ba naba-han par tu'pazi, ya guñi' aanjla rii' jweersi roo' duxa loh gadaapa ra' aanjla nin guca'ha guelrn-abwa' tin guunn ra' ba guelnah loh guidxyiyuh cun loh ñihsado'; <sup>3</sup> Squii' rahbi aanjla chi:

—Gulcwehza zi'ca gaca'hbwa' xgah nu'h garaa ra' bwiinn ra' nin naa xpwiinn Dxiohs; yaque guya'loh guca'h ra' ba bwa' chi'chiyi zahca guunn tu guelnah loh yuh cun loh ñihsado', cun loh yahga ra'.

<sup>4</sup> Ya chi'chi bihn dxiaagahn paaldaa naa ra' bwiinn ra' nin gyyuu' sehn lohcah ra' ñi'h, bazaa' ra' bwiinn chi ziga tuhbi gaywa'h chywa'h bitapa mihi bwiinn ra' nin bibwi'hi loh ra' bwiinn Israel. <sup>5</sup> Loh ra' xpwiinn guehtu Judah bibwi'hi tsi'h bichiohpa mihi ra' ba; loh ra' xpwiinn guehtu Rubehn bibwi'hi tsi'h bichiohpa mihi ra' ba; loh ra' xpwiinn guehtu Gad bibwi'hi tsi'h bichiohpa mihi ra' ba; <sup>6</sup> loh ra' xpwiinn guehtu Aser bibwi'hi tsi'h bichiohpa mihi ra' ba; loh ra' xpwiinn guehtu Neftalih bibwi'hi tsi'h bichiohpa mihi ra' ba; <sup>7</sup> loh ra' xpwiinn guehtu Simeohn bibwi'hi tsi'h bichiohpa mihi ra' ba; loh ra' xpwiinn guehtu Manasehs bibwi'hi tsi'h bichiohpa mihi ra' ba; loh ra' xpwiinn guehtu

Levih bibwi'hi tsi'h bichiohpa mihi ra' ba; loh ra' xpwiinn guehtu Isacar bibwi'hi tsi'h bichiohpa mihi ra' ba; <sup>8</sup> loh ra' xpwiinn guehtu Zabulohn bibwi'hi tsi'h bichiohpa mihi ra' ba; cun neezaa loh ra' xpwiinn guehtu Joseh bibwi'hi tsi'h bichiohpa mihi ra' ba; cun neezaa loh ra' xpwiinn guehtu Benjamihn bibwi'hi tsi'h bichiohpa mihi ra' ba.

*Bwiinn ziahan duxa ra' nin nahcu lahdxi labweh nachütsi*

<sup>9</sup> Ya chin guya'loh dee' ra' chi'chi bwa'hahn loh ziahan duxa ra' bwiinn nin ayi chyu guunn gahn gulaaba la'h ra' ba, naa ra' ba bwiinn garaatii' lahdxyi ra' bwiinn, nin naa ra' bwiinn guriin-guriin lahta ra' xteenn loh guidxyiyuh, bwiinn guriin-guriin dxi'zah ra'; zuu ra' ba nez delanta hasta zohba yahgaxiyyi roo' nez dxibaa' nee cun nez loh za Xi'hyi Dxiohs, nahcu ra' ba lahdxi labweh nee nuu llii'dzi zihn naa ra' ba, <sup>10</sup> ya jweersi roo' cañi' ra' ba squii':

Dxiohs nin zohba loh yahgaxiyyi roo' nez llaa'ndxibaa' cun nin naa Xi'hyi Ñi'h, ca'ha guelrnabwa' tin bata'h Ñi'h la'h ra' nu loh xtuhlda nu.

<sup>11</sup> Ya garaa ra' aanjla nin nuu dxibaa' rii gadiidxi-iti' xagaxiyyi Dxiohs cun gadiidxi za ra' gadaapa ra' maan nin rii hasta zuu xagaxiyyi Dxiohs dxibaa', chi'chi bazu'nllihbi ra' ba cun basiaaba loh ra' ba nez loh Dxiohs <sup>12</sup> Ya rahbi ra' ba:

Zi'chi gaca pwihsi; loh Dxiohs si nu'h gulgahbi lasahca duxa Ñi'h, nee gulgui'hnn lasahca lah Ñi'h; la'h si Ñi'h nahpa guelnaann;

loh si Ñi'h gulgadi'hi guelzuxchiilli Dxiohs; la'h si  
Ñi'h gulgann, gulgazu'nllihbi loh Ñi'h;  
la'h si Ñi'h nahpa Ñi'h guelrnabwa' neezaa guel-  
nada'n.

Zi'chi gaca, pwihsi, par tu'pazi.

<sup>13</sup> Chi'chi guñi' tuhbi ra' bwiinn guuhla chi loon  
nah ba:

—¿Chyu naa ra' nin nahcu lahdxi labweh ra' rii',  
nee canehza ze' ra' ba?

<sup>14</sup> Ya chi'chi ra'pihn loh ba:

—Daada, banaann yu'bilu'h.

Chi'chi nah ba loon:

—Bwiinn ra' rii' nin bati'dxiloh trabahjw duxa,  
ya gudxi'bi xahba ra' ba tin biaara'n cun llarihn Je-  
sucristu nin naa Xi'hyi Dxiohs. <sup>15</sup> Ni'chin nin zuu  
ra' ba hasta zuu xahgaxiiyi Dxiohs, ya riiyuhnn ra'  
ba xtsi'n Ñi'h dxyih-nague'la; ni'chin Daada nin  
nahpa guelrnabwa' nin zohba loh yahgaxiiyi roo'  
zahcanee Ñi'h la'h garaa ra' bwiinn nin rii nez loh  
Ñi'h. <sup>16</sup> Ayi ru sacazii ra' ba loh guelrchia'han, cun  
ayi ru za cwidxahga ra' ba ñihsa, nee nin ayi za  
gudxu'yi ru guelnalda'h xteenn gubihdxyi la'h ra'  
ba, <sup>17</sup> laasii la'h Xi'hyi Dxiohs nin zohba galaay-  
illee loh yahgaxiiyi roo' nin naa tronu nez dxibaa'  
gaapa la'h ra' ba ziga zi lli'hyi ra', ya chenee Ñi'h  
la'h ra' ba hasta nuu ñihsa nin naa guelnabahan;  
ya Dxiohs gucwi'dzi rwa'haloh ra' ba cun ñihsabwii  
ra' nin ru'n ra' ba.

## 8

*Nin rahca gahdzi sehyu*

1 Chin guxaala Ñi'h nin rahca gaadzi sehyu, dxyiisii biahca nez llaa'ndxibaa' ziga chi'h ga-roolda hohra, <sup>2</sup> chi'chi bwa'hahn loh gahdzi xaanjla Dxiohs zuu ra' aanjla ra' chi nez delanta loh Dxiohs nin nuu dxibaa', ya guca'ha za ra' ba gahdzi trompeta ya tuhbigahan cada tuhbigah aanjla ra' chi, <sup>3</sup> chi'chi bi' stuhbi aanjla ya guzuh aanjla chi hasta zuu bacu'gadxiah xteenn Dxiohs cun tuhbi dxi'ba nin rahca guxa'hla la'n ñi'h ganaalla ohro naa dxi'ba chi, ya guca'ha aanjla chi ziahan ya'hla tin cagu' guxa'hlaza ba loh nin cabwihdxyi-canaaba ra' xpwiinn Dxiohs nezloh Ñi'h, ya zuu ba nezloh bacu'gadxiah nin naa ganaalla ohro nezloh yagaxiyyi roo' xteenn Dxiohs, <sup>4</sup> ya nez yihca naa aanjla chi guyahsa guxa'hla chi nezloh Dxiohs tuhsi cun ziga guelrbwihdxyi-rnaaba xteenn ra' xpwiinn Dxiohs, <sup>5</sup> chi'chi la'h gahca aanjla chi guca'ha bwehla xteenn bacu'gadxiah guyuu'hun la'n dxi'ba nin rahca guxa'hla, ya chi'chi bala'ha aanjla chin loh guidxyiyuh, ya loh biaaban loh guidxyiyuh ya bidxi'ña' duxa, cun guhca tuhbi lloh roo'.

### *Xcweenta trompeta ra'*

6 Chi'chi gagaadzi ra' xaanjla Dxiohs nin nu'a ra' tuhbigah trompeta nin naa za gahdzi, guzuh xnehza ra' ba tin gucwidxaa' ra' ba trompeta ra' chi, <sup>7</sup> ya mwer tuhbi ra' trompeta nin bacwidxaa' mwer tuhbi ra' aanjla ra' chi, biaaba dxidxiah cun bwehla nin nu'chi rihn loh guidxyiyuh, ya guca'dxih nin riohnna taa'yi xteenn loh guidxyiyuh cun nin riohnna taa'yi xteenn yahga ra' cun nin riohnna za taa'yi xteenn cwa'ni'hn



ra'. <sup>8</sup> Ya chin bacwidxaa' nin raroopa aanjla chi trompeta, chi'chi biaaba tuhbi nin rluu'yi ziga dahan nin caca'dxih loh ñihsado', ya biahca nin riohnna taa'yi xteenn loh ñihsado' ziga rihn, <sup>9</sup> ya chi'chi guhchi nin riohnna taa'yi xteenn ziga garaalohtii' ra' maan ñihsa nin nuu loh ñihsado', ya cun nin riohnna taa'yi xteenn paal-daa ra' barcu nin rzah loh ñihsado' gubihyi ra'n. <sup>10</sup> Ya chin bacwidxaa' nin riohnna xaanjla Dxiohs trompeta, chi'chi biaaba tuhbi dxih roo' xteenn llaa'ndxibaa' nin zohba bwehla ziga zi tuhbi bwehla guii'dxi loh nin riohnna taa'yi xteenn loh ra' gui'w cun hasta rtahnn ñihsa. <sup>11</sup> Lah dxih chi naa Ajenjo, nin naa lah tuhbi cohsa nin naltaa duxa, ya biahca naltaa nin riohnna taa'yi xteenn ñihsa chi, ya chi'chi gudxiinn ñihsa naltaa chi la'h ziahan duxa ra' bwiinn. <sup>12</sup> Chin bacwidxaa' nin radaapa ra' xaanjla Dxiohs trompeta, chi'chi bac-ahyi nin riohnna taa'yi loh gubihdxyi cun nin riohnna taa'yi xteenn loh bwe'hw cun nin riohnna za taa'yi hasta nuu dxih ra' nin nuu llaa'ndxibaa', ya bia'han naca'hyi nin riohnna taa'yi xteenn radxyii cun nin riohnna taa'yi xteenn gue'la ya ayi ru guyuu' ra' bia'ñih taa'yi ra' chi, <sup>13</sup> chi'chi bwa'hahn nez llaa'ndxibaa' ya bihn dxiaagahn rsiaa'ha ziga tuhbi bisiah nin za'bi ñi'h nez galaayi llaa'ndxibaa' squii':

—¡Ayy, ayy, ayy! ¡Prohibi za la'h ra' bwiinn guidxyiyuh chin gucwidxaa' za schohnna aanjla trompeta! Zizahcazii duxa ra' ba.

## 9

<sup>1</sup> Chin bacwidxaa' nin rahca ga'yu xaanjla

Dxiohs trompeta, chi'chi bwa'hahn tuhbi dxih llaa'ndxibaa' biaaban loh guidxyiyuh; dxih llaa'ndxibaa' chi guca'ha chiahyi xteenn rwa' guii'dxiu xteenn gabihldxi, <sup>2</sup> ya baxaalan hasta naa gabihldxi, ya chin billaala ri'chi biria'h guhxa ri'chi ziga zi guhxa nin rre'h rwa' tuhbi horna roo', ya basie'w guhxa chi loh gubihdxyi laasii tantu guhxa roo' guhxa chi, <sup>3</sup> ya loh guhxa chi biinloh ra' maan nin rñah ziga bwi'tsisuu ya bidi'chi ra' ma gaduhbitii' loh guidxyiyuh, nee guca'ha ra'za ma guelrnabwa' gaca ñalaa'dzi ra' ma ziga ña'laa'dzi ra' llohbigwa', <sup>4</sup> nee guhdzi ra' ba loh ra' ma ayi xi guunnee ra' ma la'h cwaa'n ra' nin rii loh guidxyiyuh, nee nin tuhbi za cohsa nin nagaa' nee nin tuhbi za yahga ra' sino que sola gusa'cazii ra' ma la'h ra' bwiinn nin ayi xi bwa' xteenn Dxiohs caa lohcah ra' ñi'h, <sup>5</sup> nee guhdzi za ra' ba loh ra' ma ayi guunn ra' ma tin gachi ra' bwiinn sino que sola gusa'cazii guelnayaan nin gahw maan chi la'h ra' bwiinn loh ga'yu bwe'w, per xquelnayaan ra' ma gaca ziga xquelnayaan xteenn llohbigwa'. <sup>6</sup> Nee la'n dxyih ra' chi ziclaa'dzi ra' bwiinn gachi ra' ba per ayi chuu guelguhchi para la'h ra' ba.

<sup>7</sup> Bwi'tsisuu ra' chi rñah ziga zi maan gwahyi ra' nin zuucha'yi tin chee ra' ma loh guehrru; yihca ra' ma nuu ziga tuhbi curohn dxi'ba ohro, ya loh ra' ma naa ziga loh ra' ndxi'hw. <sup>8</sup> Nuu dxyichyihca ra' ma ziga dxyichyihca tuhbi gunna'h, ya lahyi ra' ma naa ziga lahyi tuhbi bwe'dzi, <sup>9</sup> ya gaduhbi tihxi ma naa ziga zi dxi'ba, ya bwih nin ze'nee xihyi ra' ma, naa bwih chi ziga chin riuu' bwih rullu'n ziahan roo' ra' maan gwahyi cun carretohn loh tuhbi

guehrru. <sup>10</sup> Ya llibaa'n ra' ma naa ziga llibaa'n tuhbi llohbigwa', ya loh llibaa'n ma chi guca'ha guelrnabwa' tin gusa'cazii ma la'h ra' bwiinn loh ga'yu bwe'hw. <sup>11</sup> Nahpa za ra' bwi'tsisuu rii' tuhbi nin rnabwa' loh ra' ma, nin naa xaanjla bwiinn dxaaba nin biria'h gabihldxyi; aanjla rii' laa cun dxyi'dxyi hebreu Abadohn, ya dxyi'dxyi griehgu laa ba Apoliohn (nin sa'loh guelruñihchiloh).

<sup>12</sup> Gudii'dxi mwer guelya'dxi, per caya'dxi schiohpan.

<sup>13</sup> Chin bacwihdxaa' nin rahca xo'pa aanjla trompeta, bihndxiaagahn tuhbi rsiaa'ha nin biria'h galaayi ra' gadaapa ra' cachu ra' nin caa loh bacu'gadxiah nin naa ganaalla ohro, nin nuu nez loh Dxiohs, <sup>14</sup> ya rsiaa'ha chi guñi' loh nin rahca xo'pa aanjla nin na'zu trompeta, rahbi rsiaa'ha chi squii':

—Bagaxaachi gadaapa ra' aanjla nin cadu'h rwaa' gui'w nin laa Eufrates.

<sup>15</sup> Ya seguihdu gula'h ra' aanjla ra' chi tin gadxiinn ra' ba nin riohna taa'yi lahta loh guidxyiyuh hasta rii ra' bwiinn guidxyiyuh, pwihsi bibwi'hi ra' aanjla ra' chi par si pa'caa hohra chi, dxyih chi, bwe'hw chi, cun yihza chi, <sup>16</sup> ya bihndxiaagahn paalaa naa ra' suldahdu nin dzi'ba maan gwahyi, naa ra' ba ziga chiohpa gaywa'h miyohn.

<sup>17</sup> Squii' naa ziga bwa'hahn maan gwahyi ra' chi loh bihsi nin bwa'hahn; ya nin zohba dihtsi ra' maan gwahyi ra' chi, sto' ra' ba caa tuhbi dxi'ba nin naa culohr naxñiaa, culohr asuhl, cun colohr guhtsi; ya yihca ra' maan gwahyi chi naa ziga yihca bwe'dzi, ya rwaa' ra' ma cagare'h bwehla, guhxa, cun asufre, <sup>18</sup> ya guhchi nin riohna

taa'yi xteenn lahta hasta rii ra' bwiinn pur gadx-ionna cohsa nin cagare'h rwaa' maan gwahyi chi: bwehla, guhxa, cun asufre, <sup>19</sup> ya guelrnabwa' nin guca'ha ra' maan gwahyi chi ruhnn ma guelnah rwaa' ma nee loh llibaa'n ma, pwihsi loh llibaa'n naa ziga zi bwe'lda nin nuu yihca ra' ñi'h, ya cun la'han rudi'hi ma guelnayaan.

<sup>20</sup> Ya garaa ra' bwiinn nin ayi guhchi ra' loh xquelnah gadxioonna guelya'dxi ra' rii', ayi basaa'n ra' ba loh dzi'n dxaaba nin ruhnn ra' ba, nee nin ayi za gule'hesto' ra' ba raann ra' ba bwiinndxaba ra' cun bwiinn gulaala ra' nin naa dxi'ba ohro, cun dxi'ba plahta, dxi'ba bronce, cun dxiah nee yahga. Ayi nuu gwa'ha bwiinn gulaala ra' chi nee nin ayi za rihn ra' ni'chi, nee nin ayi za nuu sah ra' ni'chi. <sup>21</sup> Nee ayi za bacwe'za za ra' ba, gwazahtii' rdxiiinn ra' ba bwiinn, nee gwazahtii' za bwiinn ra' dzi'n bidxa'ha, cun guza'bitii'za nabahan ra' ba loh guelgubwihlli nee loh guelguba'n.

## 10

### *Aanjla nin nuu chihbru'hn naa ñi'h*

<sup>1</sup> Chi'chi bwa'hahn loh stuhbi xaanjla Dxiohs nin nahpa guelrnabwa' duxa zie'yehta aanjla chi nez llaa'ndxibaa', du'bi aanjla chi xcahyi nee neezaa tuhbi guundzihin biinloh nez yihca aanjla chi, ya loh aanjla chi rcahbacha'han ziga zi loh gubihdxyi, ya ñaa' aanjla chi rñah ziga zi piyahri ra' nin naa bwehla. <sup>2</sup> Ya nuu tuhbi chihbru'hn naa aanjla chi zohballaala loh chihbru chi, ya bazuh ñaa' aanjla chi nin naa lahdu derehchu loh ñihsado' ya ñaa' rrabwehsa aanjla chi

guzuh loh guidxyiyuh, <sup>3</sup> ya chi'chi guyuu' tuhbi rsiaa'ha gudihdxyidxiah aanjla chi ziga zi rsiaa'ha xteenn tuhbi bwe'dzi chin rbwihdxyidxiah ma, nee chi'chiza guñi' gahdzi guzi'w zi'chi cun gahn-roo', <sup>4</sup> ya chin guluhlla guñi' ra' guzi'w ra' chi, chi'chi guclaa'dzihn ñuca'hn loh dxihsti garaa nin guñi' ra' guzi'w ra' chi, per lwehgu gahca bihn dxiaagahn guñi' tuhbi rsiaa'ha nez llaa'ndxibaa' squii' loon:

—Gulu'cha'yi rala'n dxyi'dxyi ra' nin guñi' gagaadzi ra' guzi'w ra' rii' sto' lu'h, ayi guca'h lu'hn loh dxihsti.

<sup>5</sup> Ya lwehgu la'h aanjla nin zuu ñaa' ñi'h loh ñihsado' cun loh guidxyiyuh, guteesa naa derehchu aanjla chi nez llaa'ndxibaa', <sup>6</sup> ya guñi' chihpa aanjla chi nez loh Yu'bi Dxiohs nin ba nabahan par tu'pazi, nin bwi'hnncha'yi guidxyiyuh dxibaa' cun ñihsado' nee cun garaa ra' za nin rii nabahan loh ra'n, squii':

—Pwihsi ayi ru gacata'h ra' dxyih ra' rii'. <sup>7</sup> Pwihsi chin gadzihn dxyih nin so'baloh gusañi' nin rahca gagaadzi aanjla cun trompeta, chi'chi ba soobaa ra' xchi'dxyi naga'tsi Dxiohs nin baluu'yi Ñi'h la'h ra' guehtu daada ra' nin guñi' xchi'dxyi Ñi'h ba guhca cadxyih roo'.

<sup>8</sup> Ya chi'chi la'h rsiaa'ha nin bihn dxiaagahn, nee guñi'n loon nez dxibaa', chi'chi gubia'garii guñi'n loon squii':

—Gwah tin guca'ha chihbru'hn nin nuu naa aanjla ri'chi nin zuu ñaa' ñi'h loh ñihsado' cun loh guidxyiyuh.

<sup>9</sup> Chi'chi guyaa'hahn hasta zuu aanjla chi ya guna'ba'hn guni'hi aanjla chi chihbru'hn chi na'h, ya squii' guñi' aanjla chi loon:

—La'n dee', gudahwun. La'n rwaa' lu'h zahca nahxin ziga zi dzihn, per nez la'n lasto' lu'h ziahca naltaa'han.

<sup>10</sup> Chi'chi guca'hahn chihbru'hn chi loh aanjla chi ya gudaawuhn chihbru chi; ya la'n rwaa'hahn biina'hn nahxin, per ya loh nin gudaawuhn chihbru chi biahca naltaa chihbru chi sto'n, <sup>11</sup> ya chi'chi nah ra' ba loon squii':

—Nnah nahpa guibia'garii lu'h chegaluu'yi lu'h dxyi'dxyi ra' nin rñi' Dxiohs chuu ru gaca loh ziahan guiidxyi ra' bwiinn, cun lahdxyi ra' bwiinn, bwiinn nin rñi' cuunchi'zi dxi'zah ra', neezaa loh ra' rrehyi ra'.

## 11

*Xcweenta garoopa ra' ndxi'hw nin ruluu'yi xchi'dxyi Dxiohs*

<sup>1</sup> Chi'chi bani'hi ra' ba na'h tuhbi ñihta nin rñah ziga tuhbi bahra nin rbihxi loh yuh, ya nah ra' ba loon:

—Gwasu'nchii tin gwagadihxi xquido' Dxiohs nee cun badihxi za xpacu'ga Ñi'h, nee balaaba paaldae naa ra' nin raann la'h Ñi'h ri'chi, o sea nin ruzu'nllihbi nez loh Ñi'h ri'chi. <sup>2</sup> Per ayi gudihxi lu'h loh laa'yitiaa'ha xteenn guido', laasii ni'chi guca'ha ra' bwiinn ziitu ra' nin chuu ñaa' guiidxyi saantu loh chywa'h bichiohpa bwe'hw, <sup>3</sup> ya na'h zixe'hla'hn chiohpa ra' daada ra' nin guiñi' xcwee'ntahn loh tuhbi mihiyi cun chiohpa

gaywa'h sesenta dxyih, nahcu ra' ba lahdxi de luto.

<sup>4</sup> Ya garoopa ra' bwiinn ra' rii' naa ra' ba garoopa ra' olivu ra' cun garoopa za gandayehru nin nuu nez loh Dxiohs, <sup>5</sup> per sidela chyuulla guiclaa'dzi gusa'cazii la'h ra' daada ra' rii', ziria'h bwehla nez rwaa' ra' ba, ya zuca'dxih ra' ba la'h ra' nin rdxyi'chinee la'h ra' ba, ya zi'chi nahpa gachi chyuchi'hzi bwiinn nin xclaa'dzi gusa'cazii la'h ra' ba, <sup>6</sup> nee nahpa za ra' bwiinn ra' rii' guelrnabwa' tin gusie'w ra' ba nez llaa'ndxibaa', tin ayi dxiaaba nin tuhbi la'h ba ñihsadixah loh ra' dxyih nin guluu'yi ra' ba xchi'dxyi Dxiohs, neezaa nahpa ra' ba guelrnabwa' tin guunn ra' ba dxiahca ñihsa ziga zi rihn, nee guunn ra' ba sa'cazii ra' bwiinn loh guidxyiyuh cun ziahan loh ra' guelya'dxi ziga chi'h zi guiclaa'dzi ra' ba. <sup>7</sup> Per chin tuulla guunn ra' ba dzi'n nin nahpa guunn ra' ba, chi'chi la'h nin naa ziga tuhbi maan ña'laa'dzi nin guiria'h la'n gabihldxyi zidxiinn maan chi la'h ra' ba, <sup>8</sup> chi'chi zia'han bwe'ltihxi garoopa ra' bwiinn ra' rii' loh cahyi xteenn guihtdxyi hasta baca'h ra' ba la'h Daada Jesucristu loh cruhzi. Guihtdxyi roo' ca nin rbwe'helah ra' ba Sodoma, neezaa Egiptu. <sup>9</sup> Ya chohnna dxyih garoolda, zwa'ha bwiinn garaa guihtdxyi ra' cun bwiinn garaa dxi'zah ra' cun bwiinn nin ze' ra' guriin-guriin lahdxyi ra' bwiinn bwe'ltihxi bwiinn guuchi ra' chi, ayi gusaa'n ra' ba guiga'tsi bwe'ltihxi ra' ba chi la'n ba', <sup>10</sup> ya garaa ra' bwiinn ra' nin nabahan ra' loh guidxyiyuh, ziahi duxa ra' ba laasii guhchi ra' garoopa ra' bwiinn rii', ya laasii tantu riahxi duxa ra' bwiinn ra' hasta zugaa'da lasaa' ra' ba

xica guelrgaa'da ra', laasii la'h garoopa ra' daada ra' nin baluu'yi xchi'dxyi Dxiohs guhchi, daada ra' nin baxe'hla guelrza'cazii duxa para la'h ra' ba. <sup>11</sup> Ya chin gudii'dxi chohnna dxyih garoolda rii', chi'chi bacwa'hn Dxiohs la'h ra' garoopa ra' bwiinn ra' chi stuhbi chi'chi gwastii ra' ba ya garaa ra' bwiinn ra' nin bwa'ha loh garoopa ra' daada ra' rii' bidxyihbi duxa ra' ba. <sup>12</sup> Lwehgu garoopa ra' bwiinn ra' chi bihn ra' ba tuhbi rsiaa'ha nin guñi' jweersi nez llaa'ndxibaa' rahbi loh ra' ba squii':

—¡Gulaa' nez guiya' rii'!

Ya bacah ra' ba nez dxibaa' loh tuhbi xcayhi, ya bwa'ha loh ra' bwiinn ra' nin rdxyi'chinee la'h ra' ba, <sup>13</sup> ya hohra chi gahca guhca tuhbi lluh roo' duxa, ya guza'bitii' loh nin rahca tsi'h taa'yi xteenn loh guihdxyi chi, ya guhchi gahdzi mihi ra' bwiinn pur lluh chi, ya za balaacui'hn bwiinn ra' nin bia'hancaa loh guelnadxyi'bi duxa chi guzo'baloh cayuhnn lasahca ra' ba lah Dxiohs nin nuu dxibaa'.

<sup>14</sup> Squii' gudii'dxi nin raroopa ya'dxi, per la'h nin riohnnan ze'.

*Nin gagaadzi xaanjla Dxiohs nin bacwidxaa' trompeta*

<sup>15</sup> Chin bacwidxaa' nin rahca gahdzi xaanjla Dxiohs trompeta chi'chi guyuu' rsiaa'ha nin cañi' nez dxibaa' rahbi squii':

La'h hohra biga'ha guinabwa' Dxiohs neezaa

Daada Jesucristu loh guidxyiyuh,

ya la'h Ñi'h zinabwa' Ñi'h par tu'pazi.

<sup>16</sup> Ya chi'chi la'h ra' galda bitapa ra' bwiinn guuhla ra' nin rii' ra' nez loh Dxiohs, biahchyu ra' ba bazu'nllihbi ra' ba hasta loh yuh guhta gurloh



ra' ba tin guunn ra' ba la'h Daada Dxiohs. <sup>17</sup> Squii' rahbi ra' ba:

Rani'hi nu guelzuxchiilli loh Yu'bilu'h Dxiohs, nin nahpa guelrnabwa' duxa;

yi'h nin naa lu'h nin guhca lu'h, nee nin chuu ru gaca, laasii guca'ha lu'h guelrnabwa' duxa tin guza'loh canabwa' lu'h.

<sup>18</sup> Bidxyi'chi ra' bwiinn guiidxyiyuh loh lu'h, per la'h dxyih badzihn chuu llahn sto' lu'h cun la'h ra' ba, guunn lu'h guelguxchisi loh ra' bwiinn guuchi,

ya gudi'hi lu'h cohsa za'ca la'h ra' xpwiinn ra' lu'h nin guñi' xcweenta lu'h, loh ra' nin gwachiisto' ra' ñi'h xchi'dxyi lu'h, loh za ra' nin ruzu'nllihbi nez loh lu'h, nicala bwiinn prohbi o bwiinn roo' ra'.

La'h dxyih badzihn cwe'hecaa lu'h la'h ra' nin ruñihchi nezloh Lu'h loh guidxyiyuh tin ñichiloh ra' ba.

<sup>19</sup> Ya chi'chi billaala xquido' Dxiohs nin nuu dxibaa', nee la'n guido' chi biinloh dxihn nin nuu dxiah hasta caa ra' dxyi'dxyi nin bia'hannee dxyi'dxyi Dxiohs la'h ra' bwiinn Israel, ya balaaca chi'h bidxi'ña' ra', balaaca chi'h guñi' za guzi'w roo ra'; nee guhca za tuhbi lloh duxa cun biaaba tuhbi dxidxiah duxa za.

## 12

*Tuhbi gunna'h cun tuhbi maan duxa nin laa dragohn*

<sup>1</sup> Chi'chi biinloh tuhbi sehn roo' llaa'ndxibaa': Xteenn tuhbi gunna'h nin du'bi gubihdxyi ziga zi xahba ba, ya bwe'hw za'bi nez ñaa' gunna'h

chi, ya yihca ba nuu tuhbi curohn nin naa cun tsi'h bichiohpa dxih llaa'ndxibaa'. <sup>2</sup> Gunna'h rii' nu'a llii'n ba, ya rbwihdxyidxiah ba nuu ba guel-nazihdzi nin gaalaa llii'n ba, pwihsi cagati'dxiloh ba guerza'cazii duxa. <sup>3</sup> Chi'chi biinloh stuhbi sehn nez llaa'ndxibaa' xteenn tuhbi maan naxñaan nin ruluu'yi ziga zi tuhbi dragohn; maan duxan; nuu gahdzi yihca ma, zohba tsi'h xcachchu ma, ya tuhbigah yihca ma nuu tuhbigah za curohn. <sup>4</sup> Ya cun llibaa'n ma basiaabatii' ma tuhbi cwa'h loh chohnna cwa'h ra' dxih nin nuu llaa'ndxibaa' para loh guidxyiyuh. Maan duxa rii' guzuh ma nez loh gunna'h nin ñaalaa Llii'n ñi'h, tin gahw ma llii'n gunna'h rii' chin gaalaa llii'n ba. <sup>5</sup> Chi'chi gu- ulaa llii'n gunna'h chi, naa llii'n ba tuhbi ndxi'hw, ya la'h bi guinabwa' bi loh ra' bwiinn guidxyiyuh ziga zi tuhbi bahra dxi'ba. Lwehgu guyahpitii llii'n gunna'h chi loh guidxyiyuh tin ziaa bi para nez dxibaa' hasta rnabwa' Dxiohs, <sup>6</sup> chi'chi ballu'n gunna'h chi nez loh dahan desiertu nez nuu tuhbi lahta nin bazuhcha'yi Dxiohs guleeza gunna'h chi, tin nez chi guyuu' nin badi'hi guehta gudahw ba loh tuhbi mihiy chiohpa gaywa'h sesenta dxyih.

<sup>7</sup> Chi'chi guyuu' guehrru nez llaa'ndxibaa' gudx- ihndxinee xaanjla Dxiohs nin laa Miguehl nee cun snuhn xaanjla Dxiohs nin rnabwa' ba cun maan duxa naxñaan chi, ya neezaa maan duxa chi cun xaanjla za ma gudxihndxi ma, <sup>8</sup> per ayi bwi'hnn ma gahn; ya ayi guyuu' ru lahta para la'h maan duxa chi cun xaanjla ma nez dxibaa'. <sup>9</sup> Ya chi'chi biria'h guna'hla ra' xaanjla Dxiohs la'h maan duxa roo' chi cun garaa ra' xaanjla ma nez loh guidxyiyuh; la'h ma nin naa bwe'lda chiempa

duxa nin naa za bwiinndxaaba, nin laa za Sa-tanahs, nin rusagui'hi la'h gaduhbi guidxyiyuh bwiinn ra'.

<sup>10</sup> Chi'chi biindxiaagahn rsiaa'ha tuhbi nin cañi' nez dxibaa' squii':

—La'h guelruta'h loh duhlda badzihn nee cun guelmilahgru cun guelrnabwa' xteenn Xchiohs nu'h nin nuu dxibaa' nee cun neezaa xquelrnabwa' Jesucristu, laasii la'h nin gulahchi guelchiah xcweenta bwihtsi lasaa' ra' nu'h nez loh Dxiohs dxyih-nague'la la'h ba babwe'hedxia'hla ra' ba loh guidxyiyuh. <sup>11</sup> La'h ra' ba bwi'hnn ra' gahn loh bwiinndxaaba xcweenta llarihn xteenn Xi'hyi Dxiohs, nee neezaa laasii gwachii sto' ra' ba xchi'dxyi Dxiohs, nee ayi bidxyihbi za ra' ba nicala ñahchi ra' ba. <sup>12</sup> Ni'chin garaa tu nin nuu llaa'ndxibaa' neezaa dxibaa', jguldxiakhil; per jprohbi za la'h ra' nin rii loh guidxyiyuh nee loh ñihsado'!, laasii la'h bwiinndxaaba biehtanee tuhbi llahn roo' loh guidxyiyuh laasii naann ba gullia'yi'hn ra' dxyih nahpa ba.

<sup>13</sup> Chin bwa'ha maan duxa chi la'h ma bare'hedxia'hla ra' ba par loh guidxyiyuh, guca'hn na'hla ma la'h gunna'h nin guulaa llii'nga'n ñi'h, <sup>14</sup> chi'chi badi'hi Dxiohs la'h gunna'h chi chiohpa xihyi ba ziga xihyi bisiah, tin gucah guzuh ba loh bwih ballu'n ba loh bwe'lda chi loh dahan desiertu, nez hasta badi'hi ra' ba guehta gahw ba loh chohnna yihza garoolda, <sup>15</sup> ya bwe'lda chi gule'he rwaa' ma ñihsaroo' duxa nez dihtsi gunna'h chi, <sup>16</sup> per guhcaneer loh yuh la'h gunna'h chi laasii gwaa' yuh ñihsa nin gule'he rwaa' maan duxa chi ya guñihchilohon, <sup>17</sup> ya chi'chi

bagaduhbi llahn duxa maan duxa chi pur la'h gunna'h chi, ya chi'chi gwagaca'nee maan duxa chi la'h za balaqui'hn bwiinn ra' nin naa ra' llii'n gunna'h chi, bwiinn ra' nin ruzo'badxiahga xchi'dxyi Dxiohs nee cun zeezah nayaa ra' ba loh xchi'dxyi Jesucristu.

## 13

### *Garooapa maan duxa*

<sup>1</sup> Guzu'hn loh yuhlli xteenn rwaa' ñihsado', ya bwa'hahn baria'caa tuhbi maan roo' nin nuu gahdzi yihca ñi'h cun zohba tsi'h xcachchu ma; ya yihca tuhbigah ra' xcachchu ma zohba tuhbi curohn, ya loh gagaadzii yihca ma caa tuhbigah ra' dxyi'dxyi nin rñi'yah la'h Dxiohs. <sup>2</sup> Ya maan roo' nin bwa'hahn chi rñah ma ziga tuhbi maan nin laa leopardu, ya ñaa' ma naa ziga ñaa' tuhbi ohsu, ya rwaa' ma naa ziga rwaa' tuhbi bwe'dzi. Ya badi'hi maan duxa nin laa dragohn chi guelrnabwa' cun yahgaxiiyi hasta rnabwa' ma cun neezaa xquelmilahgru ma la'h maan roo' chi. <sup>3</sup> Chi'chi bwa'hahn hasta bidxeeldxyihdxyi tuhbi yihca maan roo' chi nin rluu'yi bachyuu'ga tuhbi machehta, ya mweer ñahchi ma; per guyuu' biaaca hasta bidxeeldxyihdxyi yihca ma. Ya badxyigaa' duxa loh ra' bwiinn guidxyiyuh pur nin biaaca yihca maan roo' chi, ni'chin nin zee na'hla ra' ba la'h maan roo chi, <sup>4</sup> ya bazu'nllihbi ra' ba loh maan duxa nin laa dragohn laasii badi'hi ma guelrnabwa' roo' la'h maan roo chi ya squii' rñi' ra' ba:

—¿Chyu stuhbi ñahca ziga maan roo rii'? ¿Chyu laa nin gaca childxinee la'h maan ca?

<sup>5</sup> Nee gyyuu' za nin basañi' la'h maan roo ca dxyi'dxyi tin guza'loh cañi' ma garaaloh dxyi'dxyi nayachi, dxyi'dxyi nin rñi'yah la'h Dxiohs, nee gyyuu' za chy badi'hi gaapa ma guelrnabwa' loh chywa'h bichiohpa bwe'hw. <sup>6</sup> Pwihsi guñi'yah ma la'h Dxiohs guñi'yah duxa ma ziga naa lah Dxiohs, cun xpwiinn guido' Ñi'h, nee cun neezaa nin rii ra' nez llaa'ndxibaa'. <sup>7</sup> Chi'chi gyyuu' nin bwi'hnn basaa'n guca'hnee maan roo chi la'h ra' xpwiinn Dxiohs; bwi'hnn maan roo chi gahn la'h ra' ba, chi'chi gunabwa' maan roo chi garaa ra' guiidxyi bi'tu'hn ra' cun hasta naa ra' bwiinn guiidxyi roo', cun bwiinn nin rñi' guriin-guriin dxyi'zah ra' nee cun garaa za rrahsa ra' bwiinn ra', <sup>8</sup> ya nez loh maan roo chi guzu'nllihbi garaa ra' bwiinn guidxyiyuh; garaa ra' bwiinn ra' nin ayi caa lah ñi'h loh chihbru xteenn guelnabahan xteenn Xi'hyi Dxiohs, nin guhchi xcweenta ra' ba laasii chin nagahdxi cwixchih guidxyiyuh gucah loh chihbru chi lah garaa ra' nin gaca xpwiinn Dxiohs.

<sup>9</sup> Sidela chyulla zohballaala dxiahga ñi'h, chuu ba-cha'zi ba dxyi'dxyi ra' rii'. <sup>10</sup> Bwiinn nin guzee-nee prehsu la'h bwiinn ra', neezaa bwiinn ra' chi guzee prehsu; chyuu chi'h zi nin chinn la'h bwiinn cun tuhbi macheta, neezaa la'h bwiinn chi gachi ba cun macheta. Pwihsi ni'chi bwiinn ra' nin naa xpwiinn Dxiohs nahpa gaapa ra' ba paseensi nee chuu guelriachii sto' xteenn Dxiohs sto' ra' ba.

<sup>11</sup> Seguihdu bwa'hahn stuhbi maan roo' nin caria'h nez loh yuh; zohba chiohpa xcachchu ma ziga tuhbi lli'hyi, rñi' ma ziga rñi' maan duxa nin laa dragohn, <sup>12</sup> per rnabwa' za ma ziga rn-

abwa' mweer maan roo chi la'gahca nez loh maan roo chi nee ruhnn za ma rzu'nllihbi ra' bwiinn guidxyiyuh loh maan roo nin guruu'ga yihca ñi'h per biaaca yihca ma. <sup>13</sup> Neezaa guelmilahgru ra' ruhnn raroopa maan roo chi, neezaa ruhnn ma riaaba bwehla nez llaa'ndxibaa' para loh yuh nez delaantaloh ra' bwiinn.

<sup>14</sup> Rusagui'hi ma la'h ra' bwiinn guidxyiyuh ra' xcweenta guelmilahgru ra' nin ruhnn ma nez loh mweer maan roo, ya gunabwa' ma guzu'nllihbi ra' bwiinn guidxyiyuh loh tuhbi figuhra xteenn maan roo nin bidxeeldxyihdxyi yihca ñi'h cun spahda nee biaaca yihca ma. <sup>15</sup> Ya nin raroopa maan roo chi guca'ha ma guelrnabwa' tin gudi'hi ma guelnabahan la'h figuhra xteenn mweer maan roo' tin figuhra chi guunn guiñi' gachi garaa ra' bwiinn ra' nin ayi guzu'nllihbi nez loh ma, <sup>16</sup> nee gunabwa' za ma squii'; desde biñi'n cun bwiinn roo ra', rricu ra', prohbi ra', nin ayi gudoo' loh dzi'n cun nin gudoo' ra'; chuu ra' ba tuhbi bwa' lahdu derehchu naa ra' ba o locah ra' ba, <sup>17</sup> ya ayi nuu chyu bwiinn si' nin gutoo' sidela ya ayi nuu ra' ba bwa' chi, ya bwa' chi naa lah xteenn maan roo chi o número xteenn ziga lah maan chi. <sup>18</sup> Dee rchi'hn guelnaann, ya bwiinn nin nahpa guelnaann, gulaaba ba número xteenn maan roo chi, nin naa tuhbi número xteenn lah tuhbi ndxi'hw, ya número chi naa seientos sesenta y seis.

## 14

*Cansiohn xteenn tuhbi gaywa'h chywa'h bitahpa mihi bwiinn ra'*

<sup>1</sup> Ya seguihdu chin bwa'hahn stuhbi, chi'chi bwa'haloon la'h Lli'hyi xteenn Dxiohs zuu Ñi'h yihca dahan nin laa Siohn, ya ri'chi za rii ra' bwiinn nin naa ra' ziga tuhbi gaywa'h chywa'h bitahpa mihyi ra' nin caabwa' sehn xteenn Lli'hyi nee cun sehn za xteenn Xtaada Ñi'h. <sup>2</sup> Lwehgu biindxiaagahn tuhbi rsiaa'ha nin ze' nez dxibaa', naa rsiaa'ha chi o bwih chi ziga chin riuu' bwih ñihsa ziahan gui'w; naa bwih chi ziga zi bwih nin riuu' chin rñi' guzi'w jweersi roo; naa za rsiaa'ha chi ziga rsiaa'ha xteenn chin ru'lda ziahan ra' bwiinn aarpa ra', <sup>3</sup> ya cayu'lda ra' ba tuhbi cansiohn nacuubi nez delaanta hasta zuu yagaxiyyi nin zohba nin rnabwa', neezaa nez loh ra' gadaapa ra' maan ra' nin nabahan ra'pa'h, neezaa nez loh ra' bwiinn guuhla ra'. Ayi chyu stuhbi bwiinn ra' nin ñahca ñu'lda cansiohn chi sola la'h ra' bwiinn nin naa tuhbi gaywa'h chywa'h bi tahpa mihyi bwiinn ra' nin gula'h loh duhlda nez loh garaatii' ra' bwiinn guidxyiyuh rahca cansiohn chi. <sup>4</sup> Dee ra' nin ayi baxi'n la'h ra' ñi'h loh ra' gunna'h dxaaba, pwihsi naa ra' ba bwiinn saantu ra', nee zeenee Lli'hyi xteenn Dxiohs la'h ra' ba nez chi'h zi zee Ñi'h. La'h ra' ba nin gula'h loh duhlda loh ra' bwiinn guidxyiyuh ziga mwer jusehchi nez loh Dxiohs cun nez loh Lli'hyi xteenn Ñi'h; naa ra' ba ziga tuhbi guhn nez loh Ñi'h, <sup>5</sup> laasii ayi bidxeela nin tuhbi dxyi'dxyi dxixi'hw nez rwaa' ra' ba, pwihsi ni'chin nin ayi naa ra' ba dxiimma nez loh yahgaxiyyi hasta zohba Dxiohs.

*Dxyi'dxyi nin baluu'yi chohnna ra' xaanjla Dxiohs*

<sup>6</sup> Chi'chi bwa'hahn tuhbi xaanjla Dxiohs nin za'bi nez galaayillaa'ndxibaa', ze'nee ba dxyi'dxyi nin banaa para tu'pazi xteenn Dxiohs tin gu-luu'yi aanjla chin nez loh ra' bwiinn guidxyiyuh; garaa ra' loh ra' guiidxyi roo ra' cun guiidxyi bi'ti'hn ra', nez loh ra' bwiinn nin rñi' guriin-guriin dxyi'zah ra', nee nez loh ra' bwiinn ra' nin naa guriin-guriin rrahsa ra', <sup>7</sup> ya guñi' ba squii' jweersi roo':

—¡Gulguidxyihbi Dxiohs!, ¡gulgui'hnn lasahca lah Ñi'h!, laasii la'h hohra biga'ha guunn Ñi'h guelguxchisi loh garaa ra' bwiinn guidxyiyuh, ni'chin gulgasu'nllihbi nez loh nin bwi'hnncha'yi guidxyiyuh cun dxibaa', neezaa ñihsado', nee cun hasta za rtahn ñihsa.

<sup>8</sup> Chi'chi ziaa gana'hla stuhbi aanjla nin cañi' squii':

—¡La'h guiidxyi roo' nin laa Babilonia guñihchiloh!, ya la'n biaaba laasii gulu'gui'wun guzuhdzi ra' garaa ra' guidxyi ra' xteenn guidxyiyuh pur xcweenta cohsa duhlda ra'.

<sup>9</sup> Chi'chi na'hla gahca nin riohna la'ga'h xaanjla Dxiohs, nin guñi' jweersi roo' rahbi:

—Sidela chyulla guzu'nllihbi loh maan roo nee cun ziga figuhra xteenn ma, nee gusaa'n bwiinn chi chuu ba bwa' xteenn maan chi locah ba o naa ba, <sup>10</sup> zuti'dxiloh duxa bwiinn chi guelrza'cazii nin guixe'hla Dxiohs zuti'dxiloh ba cohsa ra' rii' loh bwehla cun loh cohsa nin laa asufre nez delanta loh ra' xaanjla Dxiohs nee cun nez delanta loh za Lli'hyi xteenn Dxiohs. <sup>11</sup> Per guhxa nin cayahca nin za'bi nez loh ra' ba, guillii-guillii par tu'pazi



ziuu'hun, nee ayi chuu guelrzi'laadzi ri'chi dxyih-nague'la para la'h ra' nin bwi'hnn bazu'nllihbi loh maan chi nee cun figuhra xteenn ma, o dela caa ra' ba bwa' xteenn ma o ziga bwa' xteenn lah ma. <sup>12</sup> Pwihsi ni'chin la'h ra' bwiinn ra' nin naa xpwiinn Dxiohs nin ruzo'badxiahga xchi'dxyi Ñi'h nee zeezah dzi'tsi ra' ba loh xneziuh Jesucristu nahpa ayi guiria'h gahn ra' ba.

<sup>13</sup> Ya chi'chi biindxiaagahn cañi' tuhbi nin cañi' loon nez llaa'ndxibaa' squii':

—Baca'h squii': “Dichohsa ra' bwiinn ra' nin gachi nin riachii sto' ñi'h xchi'dxyi Jesucristu nnah nee par delanta.”

Chi'chi biindxiaagazahn cañi' Spíritu Saantu xteenn Dxiohs:

—Zi'chi, tin guzi'laadzi ra' ba, ya ayi ru gunn ra' ba dzi'n, laasii la'hnu'h naann la xi dzi'n bwi'hnn ra' ba.

### *Jusehchi xteenn guidxyiyuh*

<sup>14</sup> Chi'chi bwa'hahn tuhbi xcahyi labweh, ya loh xcahyi chi zohba tuhbi nin rñah ziga Llii'n Dxiohs nin naa ndxi'hw ya zohba tuhbi curohn nin naa ganaallatii' ohro yihca Ñi'h, ya nuu tuhbi hohsa naa Ñi'h nee caa duxa loh hohsa chi, <sup>15</sup> ya chi'chi biria'h tuhbi xaanjla Dxiohs xquido' Ñi'h, cañi' aanjla chi jweersi roo' loh nin zohba loh xcahyi squii':

—Gulu'tii xohsa lu'h tin batiaa'ha xli'hn lu'h, laasii la'h hohra biga'ha gutiaa'ha lu'h xli'hn lu'h loh gaduhbi guidxyiyuh laasii ya la'guhla.

16 Ya chi'chi guca'ha nin zohba loh xcahyi xohsa Ñi'h gulluhbi Ñi'hn loh guidxyiyuh tin bati'aa'ha Ñi'h nin naa xli'hn Ñi'h loh guidxyiyuh rii', 17 ya chi'chi biria'h za stuhbi xaanjla Dxiohs la'n xquido' Ñi'h nin nuu dxibaa', nuu za tuhbi hohsa nin caa duxa rwaa' ñi'h naa aanjla chi, 18 chi'chi biria'h stuhbi xaanjla Dxiohs nez hasta naa bacu'gadxiah xteenn Dxiohs nin nuu dxibaa'. Aanjla chi nahpa guelrnabwa' loh bwehla duxa, ya guñi' aanjla chi jweersi roo duxa loh nin nuu hohsa naduxa naa ñi'h squii':

—Guca'ha xohsa lu'h bachyuu'ga garaa ra' rrasima uva nin nuu ra' loh guidxyiyuh rii', laasii banaa guirwa'ha ra'n baguhla ra'n.

19 Ya chi'chi gulluhbi aanjla chi xohsa ba loh guidxyiyuh, tin basia'pitii ba uva loh guidxyiyuh, tin bachah ban la'n hasta bitaa'ha yihca ra'n, laasii bidxyi'chi Dxiohs pur xcweenta ra'n, 20 ya bitaa'ha yihca ra' uva ra' chi nez rwaa' gui'hdxyi Jerusalehn, ya zi'hyi duxa rihn biria'h yihca ra' uva ra' chi, ya biga'ha rihn chi ziga zi chin riuu' ñisyuh gui'w, ya bibi'hyi rihn chi ziga chi chohnna gaywa'ha mihiy metru gadiidxi hasta bitaa'ha yihca ra' uva ra' chi.

## 15

*La'h ra' xaanjla Dxiohs nin nu'a gagaadzi lulchima ra' guelrza'cazii ra'*

1 Chi'chi bwa'ahn stuhbi sehn roo' llaa'ndxibaa' nin bachi'bi duxa na'h; bwa'hahn gahdzi xaanjla Dxiohs cun gagaadzi guelninrusa'cazii ra' nin

naa luulchima ya ni'chi naa luulchima xquel-nadxyi'chi Dxiohs, nin garia'llahn Ñi'h la'h ra' bwiinn guidxyiyuh. <sup>2</sup> Bwa'ha zahn tuhbi ziga nin rñah ziga ñihsado' nin naa ziga cristal nu-uchin bwehla, ya garaa ra' bwiinn ra' nin ayi guzu'nllihbi nez loh maan roo' cun ziga xfiguhra ma nee nin ayi za basaa'n ñicah tihxi ra' ba número, nin lah maan chi; zuu ra' ba galaayi ñihsado' chi, nee ca'ha ra' ba arpa ra' nin badi'hi Dxiohs la'h ra' ba, <sup>3</sup> ya cayu'lda ra' ba tuhbi coru xteenn guehtu Moisehs nin guhca xpwiinn Dxiohs, nee cun coru za xteenn Xi'hyi Dxiohs; ya squii' naa coru chi:

Cohsa roo' duxa naa dzi'n nin bwi'hnn lu'h Yu'bilu'h, Daada Dxiohs, nin nahpa garaatii' ra' guelrnabwa'.

Ruhnn Yu'bilu'h ganaalla dzi'n za'ca, rñi' za Yu'bilu'h ganaalla dxyi'dxyi ra' nin guchii, nee Yu'bi za lu'h naa lu'h Rehyi loh garaa ra' bwiinn guidxyiyuh.

<sup>4</sup> ¿Chyu ayi guidxyihbi yi'h Daada?

¿Chyu ayi guunn lasahca lah Yu'bilu'h?

Pwihsi sola yi'h dxi'h naa lu'h saantu,

ya zie'biiga ra' garaa ra' bwiinn guidxyiyuh ra' tin guzu'nllihbi ra' ba nez loh Yu'bilu'h,

laasii ba baluu'yiloh lu'h garaa ra' xtsi'n za'ca Yu'bilu'h.

<sup>5</sup> Ya seguihdu bwa'hahn nez llaa'ndxibaa', billaala guido' saantu roo' nez dxibaa' hasta riuu'cha'yi tahblu dxiah nin caa lehyi. <sup>6</sup> Rwaal guido' saantu roo' chi biria'h gahdzi xaanjla Dxiohs nin ca'ha gahdzi guelrusa'cazii nin dxiaaba loh guidxyiyuh. Nahcu ra' aanjla ra' chi ganaalla lahdxi labweh ra' nin rca'bacha'h ra' za

lahdxi chi, neezaa nuu tuhbigah ra' cinturohn nin naa cun ohro lasto' ra' aanjla ra' chi. <sup>7</sup> Ya chi'chi loh gadaapa ra' nin naa ziga maan nabahan ra' nin nuu loh Dxiohs dxibaa', ya tuhbi maan ra' chi badi'hi tuhbigah cohpa la'h cada tuhbigah aanjla ra' nin naa gahdzi chi, ya cohpa ra' chi naa ra' ganaalla ohru, ya la'n cohpa ra' chi nuu guelguxchisi xteenn Dxiohs nin banabahan par tu'pazi. <sup>8</sup> Ya la'n guido' saantu roo' chi gwadxahan guhxa nin naa guelña'ñih cun xquelrnabwa' roo' Dxiohs, ya ayi chyu guhcatii' ñiu'tii' la'n guido' saantu roo' chi hasta que noyi cha'loh gagaadzi ra' guelrusa'cazii ra' nin ca'ha gagaadzi ra' xaanjla Dxiohs.

## 16

### *Cohpa ra' nin gadxah ra' xquelguxchisi Dxiohs*

<sup>1</sup> Chi'chi biindxiaagahn rsiaa'ha tuhbi nin cañi' jweersi roo' la'n guido' saantu roo' nin nuu dxibaa', cañi' ni'chi loh ra' gagaadzi xaanjla Dxiohs squii':

—Gulchegala'ta guelguxchisi xteenn Dxiohs nin nuu la'n gagaadzi cohpa ca loh guidxyiyuh.

<sup>2</sup> Ya gwah mweer tuhbi ra' aanjla chi, ya bala'ta ba nin nuu la'n xcohpa ba loh guidxyiyuh, ya garaa ra' bwiinn ra' nin caa bwa' xteenn maan roo' nee bwiinn ra' za nin bazu'nllihbi ra' nez loh figuhra xteenn maan chi, biria' tuhbi guii'dxyu tihxi ra' ba nin badi'hi guelnayaan duxa tihxi bwiinn ra' chi, <sup>3</sup> ya bwi'hnn tucagri la'h nin ra-roopa aanjla chi bala'ta ba xcohpa ba loh ñihsado', ya ñihsa xteenn ñihsado' chi biahcan ziga rihn xteenn tuhbi bwiinguuchi nin rlli'h llarihn ñi'h,

ya guhchi garaa ra' maan ra' nin naa maan ñihsa ra' nin nuu loh ñihjado' chi. <sup>4</sup> Lwehgu bwi'hnn tucabri la'h nin riohna aanjla bala'ta ba xcoha ba loh gui'w ra' cun hasta catahn ra' ñihsa, ya biahca ra'n ziga rihn. <sup>5</sup> Lwehgu biindxiaagahn guñi' aanjla xteenn ñihsa ra' chi squii':

—Bwen duxa naa Yu'bilu'h Daada Dxiohs nin naa pa'h saantu roo'; Yi'h naa lu'h nnah nee zi'ca gahca za naa lu'h desde galohtii'yi laasii cayuhnn Yu'bilu'h guelguxchisi xcweenta cohsa ra' rii', <sup>6</sup> laasii la'h ra' dee' ra' nin gudxiinn la'h ra' xpwiinn Yu'bilu'h nin gulli'h llarihn ra' ñi'h, neezaa ra' xpwiinn lu'h nin baluu'yi xchi'dxyi Yu'bilu'h, pwihsi yi'h cayuhnn lu'h cayee' ra' ba rihn, laasii ruhnn tucahrin la'h ra' ba.

<sup>7</sup> Ya chi'chi biindxiaagahn cañi' nin cañi' nez loh bacu'gadxiah squii':

—Guchii pa'h lu'h, Daada Dxiohs nin nahpa garaatii' ra' guelrnabwa'; xquelguxchiisi Yu'bilu'h naan guchii pa'h nee naa xnehza za ra'n.

<sup>8</sup> Ya chi'chi la'h nin radaapa aanjla bachah ba nin nuu la'n coha nin nuu naa ba loh gubihdxyi, tin zi'chi guhpa gubihdxyi guelrnabwa' baca'dxih gubihdxyi la'h ra' bwiinn cun dxih loh gubihdxyi.

<sup>9</sup> Ya garaa ra' bwiinn guidxyiyuh guca'dxih duxa ra' ba per nicala zi'chi guzahca ra' ba per ayi bwi'hnn ra' ba lligaaba ñusaguu'dzi sto' ra' ba nez loh Dxiohs ñiñi' za'ca ra' ba pur la'h Ñi'h, mahzi la'la'ga'h guñi'yah ra' ba la'h Dxiohs nin nahpa guelrnabwa' loh ra' cohsa ra' rii'. <sup>10</sup> Ya chi'chi guca'ha nin rahca ga'yu aanjla coha nin nuu naa ba bachah ban loh yahgaxiiyi xteenn maan

roo', ya bia'han nacahyi hasta rnabwa' maan roo' chi; per la'h ra' bwiinn sola riigaxa'ta lahyi ra' ba luhdxyi ra' ba rwaa' ra' ba tantu guelnayaan nin cagati'dxiloh ra' ba, <sup>11</sup> per nicala zi'chi guzahca ra' ba per ayi basaguu'dzi sto' ra' ba nee gwazahtii' guñi'yah ru ra' ba la'h Yu'bi Dxiohs nin nuu dxibaa' laasii cagati'dxiloh ra' ba guelnayaan duxa xcweenta ra' guii'dxyu nayaan ra' nin cagasa'cazii la'h ra' ba. <sup>12</sup> Ya nin rahca xo'pa aanjla bala'ta ba nin nuu la'n cohpa nin nuu naa ba loh gui'w nin laa Eufrates, ya gubihdzi ñihsa gui'w chi tin guyuu' tuhbi nehza para la'h ra' rrehyi ra' nin ze' nez hasta rtahn gubihdxyi, <sup>13</sup> ya chi'chi bwa'hahn biria'h chohnna spíritu dxaaba rwaa' maan duxa nin laa dragohn cun rwaa' maan roo' cun rwaa' profeta nin rusagui'hi; naa ra' spíritu ra' chi ziga naa ra' guraahn. <sup>14</sup> Dee' ra' nin naa ra' spíritu xteenn bwiinndxaaba, ruhnn ra'n milahgru ra', sehn roo' ra'; ya riah ra'n loh garaa ra' rrehyi ra' nin nuu loh guidxyiyuh tin gadiaa'ha ra' garaa ra' bwiinn guidxyiyuh tin gaca ra' ba tuhsi para guca'nee ra' ba la'h Yu'bi Dxiohs nin nahpa garaa ra' guelrnabwa' chin gadzihn Ñi'h loh guidxyiyuh. <sup>15</sup> “¡Gulguia'ha! Na'h dxie'ldahn ziga zi chin ayi nuu dxyi'dxyi radzihn guba'n zi'chi zi gadzihna'hn. Dichohsa ra' nin cabweeza la'n dxyih ra' chi, cabwe'he xca'lda ra' ba nee caywa'ha ra' ba gu garaa ra' xahba ba tin ayi sah llihgabwe'hela ra' nee dxia'hanxtuhyi ba loh ra' bwiinn.” <sup>16</sup> Chi'chi gutiaa'ha ra' ba garaa ra' bwiinn ra' rii' tuhbi lahta hasta laa cun dxyi'dxyi hebreu Armagedohn.

<sup>17</sup> Ya chi'chi la'h nin rahca gahdzi aanjla guca'ha ba cohpa nin nuu naa ba bachah ban loh bwih zi, ya desde nez la'n guido' saantu roo' nin nuu nez dxibaa' biria'h tuhbi rsiaa'ha roo' hasta zuu yahgaxiiyi xteenn Dxiohs nin guñi' squii':

—La'n naa, la'n guya'loh.

<sup>18</sup> Chi'chi bidxi'ñaa' duxa, cun rsiaa'ha duxa xteenn ra' du'h guzi'w, ya loh guidxyiyuh guhca tuhbi lluh roo' duxa nin nagahdxi gacatii' loh garaa ra' lluh nin rahca desde nin rii nabahan bwiinn ra' loh guidxyiyuh. <sup>19</sup> Chin guhca lluh roo' duxa chi, birehza guidxyi roo' duxa ca; guhcan chohnna taa'ha, ya guihdxyi roo' ra' ziga ciudahd ra' nin nuu loh guidxyiyuh gurih ra'n, ya baganna sto' Dxiohs guihdxyi roo' nin laa Babilonia, tin guya'loh bare'llahn Dxiohs la'h guihdxyi chi. <sup>20</sup> Garaa ra' isla ra' cun dahan ra' guñihchiloh ra'n, <sup>21</sup> neezaa biaaba ra' dxidxiah duxa ra' nez dxibaa' para loh guidxyiyuh; dxidxiah ra' chi naa'ha ra'n ziga chwa'hgah kihlu, ya bwiinn ra' guñi'yah duxa ra' ba la'h Dxiohs laasii basiaaba Ñi'h dxidxiah duxa ra' chi, laasii guhcan tuhbi guelrza'cazii roo' duxa para la'h ra' bwiinn guidxyiyuh.

## 17

*Guelguxchisi roo' nin guunn Dxiohs la'h tuhbi gunna'h dxaaba*

<sup>1</sup> Ya chi'chi bwa'hahn loh ra' gahdzi aanjla nin ca'ha gagaadzi cohpa biria'h tuhbi nin guñi' loon squii':

—Rii' guda', tin gulu'yi'hn yi'h cuun nin naa guelrza'cazii duxa xteenn gunna'h dxaaba rii' nin zohba hasta nuu zi'hyi ñihsa ra'. <sup>2</sup> Garaa ra' rrehyi

ra' nin nuu loh guidxyiyuh guhpa ra' ba duhlda pur gunna'h rii' ya basi'naa'ha xquelrusagui'hi gunna'h rii' la'h ra' ba pur nin bidxi' duhlda ra' ba la'h gunna'h rii'.

<sup>3</sup> Lwehgu ziga loh tuhbi baca'lda gwaneen aanjla chi na'h loh tuhbi dahan desierto, ya ri'chi bwa'hahn tuhbi gunna'h zohba ba dihntsi tuhbi maan roo' naxña, ya gaduhbitii' tihxi ma caa dxyi'dxyi ra' nin rñi'yah la'h Yu'bi Dxiohs nee gahdzi naa yihca ma, zohba za tsi'h xcachchu ma. <sup>4</sup> Gunna'h rii' nahcu ba tuhbi lahdxi nin naa chiohpa culohri; tuhbin naa murahdu cun naxña, ya zuucha'yi ba cun ohro, cun dxiah josca ra' nee cun perla ra' nin lasahca duxa, ya neezaa nuu naa gunna'h chi tuhbi cohpa nin naa ganaalla tii' ohro nin gadxah cohpa gubwihlli nin bwi'hnn ba cun bwiinn guidxyiyuh ra', <sup>5</sup> ya gunna'h ca locah ba caa tuhbi dxyi'dxyi nin ayi chyu rabwe'hecaa xa naa dxyi'dxyi ra' chi, per squii' rñi' dxyi'dxyi chi: “Guihdxyi Babilonia guroo', nin naa xnaan gunna'h dxaaba ra' nee cun garaaloh ra' cohpa dxaaba ra' nin ruhnn ra' bwiinn loh guidxyiyuh.” <sup>6</sup> Chi'chi lwehgu badi'hihn cweenta nuullaadxuu yihca gunna'h chi cun llarihn ra' xpwiinn Dxiohs nin badxiinn ba, nee cun neezaa llarihn ra' bwiinn ra' nin baluu'yi xchi'dxyi Jesucristu. Ya chin bwa'hahn cohpa ra' chi bidxyiibi duuxa'h, <sup>7</sup> ya chi'chi nnah aanjla chi loon squii':

—¿Xixnaa rluu'yi cadxyihbi lu'h? Na'h ziñaan loh lu'h xa naa xcweenta gunna'h ca, nee cun xcweenta maan roo' nin nuu gahdzi yihca ñi'h ca nee gahdzi za xcachchu ma. <sup>8</sup> Maan roo'



nin bwa'ha lu'h naa ma tuhbi maan nin guyuu' cadxyih roo', ya ziga nnah ayi ma la'n dxyih ra' rii' per la'h dxyih biga'ha garia'h ma gabihldxi, chi'chyi cha'lohtii' ñichiloh ma. Ya bwiinn ra' nin nabahan loh guidxyiyuh nin ayi gucah lah ra' ñi'h loh dxihtsi xteenn guelnabahan xteenn Dxiohs, dxihtsi nin guhcatcha'yi desdeyi chin nagahdxi cwachixchih Ñi'h guidxyiyuh, zidxyihbi duxa ra' ba chin gwa'ha ra' ba loh maan ca, maan nin gubahan desde cachieempa roo', per ayiru ma la'n dxyih ra' rii' per zibia'garii dxi' ma stuhbi.

<sup>9</sup> 'Rii' nuu tuhbi dxyi'dxyi para la'h ra' nin gacabwa': Nin naa gahdzi yihca maan chi naa gahdzi dahan ra' nin zohba gunna'h chi yihca ñi'h; <sup>10</sup> nee naa za ra'n gahdzi rrehyi: ga'yu rrehyi ra' chi la'h ra' ba guñihchiloh ra' la, yannah la'h tuhbi ba canabwa' nnah, ya stuhbi ba nagahdxi dxiinlon ba. Ya chin dxi' stuhbi ra'ba nin naa luulchima, ayi gacata'h ba ziahan dxyih. <sup>11</sup> Ya chi'chi la'h maan roo' nin guyuu' cadxih roo' nee nicala ayiru ma nnah, naa nin rahca xuhnna rrehyi ra' per ya luulchimatii' cha'lohtii' ba para tu'pazi.

<sup>12</sup> 'Gadzi'h ra' xcachchu ma nin bwa'ha lu'h naa tsi'h ra' rrehyi ra' nin nagahdxi guinabwa', per sola tuhbi hohra si gapa ra' ni'chi guelnabwa', tuhsi cun maan roo'. <sup>13</sup> Gahdzi'h ra' rrehyi ra' rii' gaca xigaaba ra' ba tuhsi, ya zudi'hi ra' ba xlajweersi ra' ba cun xquelnabwa' ra' ba la'h maan roo' chi. <sup>14</sup> La'h ra' dee ra' nin guca'hnee la'h Lli'hyi xteenn Dxiohs, per zuhnna Lli'hyi chi gahn loh ra' cohsa ra' chi laasii la'h Ñi'h naa Ñi'h Daada loh garaa ra' daada ra' nee naa za Ñi'h rrehyi

loh garaa ra' rrehyi ra' nin nuu loh guidxyiyuh, ya garaa ra' nin na'hla la'h Ñi'h, naa bwiinn ra' nin gulií Dxiohs nee naa ra' ba bwiinn nayaa nin zeezah dzi'tsi loh xchi'dxyi Ñi'h.

<sup>15</sup> Neezaa guñi' aanjla chi loon squii':

—Ñihsa ra' rii' nin bwa'ha lu'h hasta zohba gunna'h dxaaba ca, naan garaa ra' guihdxyi ra', garaa ra' bwiinn ra', garaa ra' bwiinn ra' nin rñi' guriin-guriin dxyi'zah ra' cun garaa ra' lahdxyi ra' bwiinn nin nuu loh guidxyiyuh. <sup>16</sup> Ya gadzi'h cahchu ra' nin bwa'ha lu'h yihca maan roo' chi, zidxyi'chinee ra'n la'h gunna'h dxaaba chi. Zuzuh lligabwe'hla ra'n la'h gunna'h dxaaba ca zahw ra'n xpwe'hla gunna'h dxaaba chi, nee zuca'dxih za ra'n la'h gunna'h chi. <sup>17</sup> Dxiohs ya badi'hi Ñi'h para guunn ra' ba lligaaba chi, tin guica'ha maan roo' chi guelrnabwa' hasta que no cha'loh dxyi'dxyi ra' nin guñi' Dxiohs. <sup>18</sup> Ya gunna'h nin bwa'ha lu'h naa guihdxyi roo' nin nugasagui'hi yihca ra' rrehyi ra' nin nuu loh guidxyiyuh.

## 18

### *Xcweenta ziga guñihchiloh guihdxyi Babilonia*

<sup>1</sup> Chi'chi bwa'hahn loh stuhbi xaanjla Dxiohs nin ze'yehta nez llaa'ndxibaa' cun ziroo' duxa guelrnabwa', ya hasta loh yuh bazi'ñih lla'ñih xteenn aanjla chi, <sup>2</sup> ya cun tuhbi rsiaa'ha duxa guñi' aanjla squii':

—La'h guihdxyi Babilonia guñihchiloh ya la'n guñihchiloh, la'n biahca chi'h lahdxyi ra' bwiin-ndxaaba ra', hasta rca'nzaa garaa clahsa spíritu

dxaaba ra' nee gudahla xpichiehza ra' maan nin zohba xihyi ra' nin naa ñi'hin maan dxaaba, cun maan duxa ra' <sup>3</sup> laasii la'h yihca garaa ra' bwiinn guidxyiyuh guyuu' llaadxuu cun xcweenta duhlda nin bayihdxyi ra' ba la'h gunna'h dxaaba rii', garaa ra' za rrehyi ra' nin nuu loh guihdxyiyuh gulu'tii za ra' ba duhlda cun gunna'h dxaaba chi. Ya garaa ra' bwiinn nin ruhnn guri'xi guhca rricu ra' ba pur xcweenta cohsa dxaaba ra' nin ruhnn gunna'h dxaaba chi.

<sup>4</sup> Ya chi'chi bihna'hn stuhbi rsiaa'ha nin ze' nez llaa'ndxibaa' nin guñi' squii':

—Gulguiria'h loh guihdxyi ca la'htu bwiinn ra' nin naa ra' xpwii'nnahn, tin ayi neezaa tu chiilli tu xtuhlda ra' bwiinn ra' ca, nee tin ayi tiidxi tu loh guelrza'cazii duxa ra' nin gusa'cazii la'h ra' ba, <sup>5</sup> laasii guyuu' duxa xtuhlda ra' ba, hasta badiaa'ha muntohnan nez loh Dxiohs dxibaa', ni'chin nin bagannasto' Dxiohs xtuhlda ra' ba. <sup>6</sup> Gulgadi'hi la'h gunna'h ca ziga gahca nin badi'hi ba la'h ra' snuhn ra' bwiinn, nee gulgasadxihlli la'h gunna'h ca chiohpa tantu pur cweenta nin bwi'hnn ba. Gulgagu'chi guelrza'cazii duxa nin bati'dxi gunna'h dxaaba ca la'h ra' bwiinn chiohpa bweelta, gulgui'hnnan naa'ha duxa ru para la'h gunna'h ca la'hgahca ziga bwi'hnnnee ba la'h ra' snuhn ra' bwiinn. <sup>7</sup> Gulgadi'hi tuhbi guelrza'cazii duxa la'h gunna'h dxaaba ca laasii gubahan ba loh guidxyiyuh ziga chi'h zi nin guclaa'dzi ba nee cun bwi'hnn lasahca ba la'hgahca ba. Ni'chin nnah gulgasa'cazii ba tin dxiagaadxuu loh nin gubahan nasaa ba cun ziga bwi'hnn lasahca za ba la'h ba, nee zi'chi gahca za gaca la'n lasto'

ba laasii la'n lasto' ba bwi'hnn ba lligaaba squii':  
 “Na'h zo'ba'hn ziga zi tuhbi rrehyna; ayi naan  
 biuhda, nee ayi chyu gusiahchyu loh xigaa'bahn.”

<sup>8</sup> Pwihsi ni'chin loh tuhsi dxyih dxiaaba garaa  
 guelguxchisi xteenn Dxiohs yihca gunna'h dx-  
 aaba ca, ziga guelguhchi, guelnalaasa duxa, guel-  
 rchia'han; nee guica'dxih ba laasii guelrnabwa'  
 roo' duxa nahpa Daada Dxiohs nin nuu dxibaa'  
 nin guunn guelguxchisi xcweenta gunna'h chi.

<sup>9</sup> Ya garaa ra' rrehyi loh guidxyiyuh nin bidxa'ga  
 la'h gunna'h dxaaba rii' zu'n ra' ba nee ziaa duxa  
 lasto' ra' ba pur nin gwa'ha ra' ba la'h gunna'h rii'  
 chin chasa guhxa nin caca'dxih gunna'h dxaaba  
 rii'. <sup>10</sup> Zia'han ra' ba zihtu laasii guidxyihbi ra' ba  
 xcweenta guelrza'cazii xteenn gunna'h chi, nee  
 guiñi' ra' ba squii':

—¡Ayy probhi za yi'h!, guihtxyi guroo' Babilo-  
 nia, guihtxyi nin mahzi lasahca duxa; pwihsi pur  
 minuhtu si badzihn bina'zu lu'h loh guelrza'cazii.

<sup>11</sup> Ya bwiinn guri'xi ra' nin nuu loh guidxyiyuh  
 zu'n duxa ra' ba pur xcweenta guihtxyi chi, laasii  
 ayi ru chuu nin si' garaaloh nin rutoo' ra' ba. <sup>12</sup> Nin  
 rutoo' ra' ba naa ra' ziga ohro, plahta, cun dxiah  
 ra' nin nuu dxiah za'ca ra', perla ra', lahdxi nin  
 laa linu finu cun lahdxi nin naa sehda cun nin naa  
 culohr murahdu-naxñiaa, cun neezaa garaalohtii'  
 yahga za'ca ra', nee cun cohsa ra' nin naa cun  
 marfil, bronce ra', cun dxi'ba ra', cun marmol,  
<sup>13</sup> cun canehla, cun garaaloh lah guelwawh, cun  
 ya'hla neezaa mirra cun perfume ra', cun vihnu,  
 nsehchi, harina za'ca cun trihgu, nee cun neezaa  
 guidxa'h ra' nin rwa' carga, lli'hyi, maangwahyi

ra'; carrwaje ra', nee hasta neezaa bwiinn ra' nin gudoo'tii'; <sup>14</sup> ya ziuu'-sa'bi dxyi'dxyi squii':

—¡Ayiru nahpa lu'h ninahxi nin biuu' duxa sto' lu'h, yannah la'h lu'h bañihchitii' para tu'pazi garaatii' cohsa za'ca cun cohsa za'ca duxa ra' nin guhpa lu'h, nee nin stuhbi ayi chuu ru ra'n!

<sup>15</sup> Ya nin bwi'hnn ra' guri'xi cun xcweenta ra' cohsa ra' rii' nee guhca ra' ba rricu pur guihtxyi rii', zia'han ra' ba zihtu laasii tahtu guidxyihbi ra' ba pur guelrza'cazii nin sacan, zahca nalaasa sto' ra' ba nee zu'n ra' ba; <sup>16</sup> nee zahbi ra' ba squii':

—¡Ayi, prohbi la'h guihtxyi roo' ca! Naan ziga tuhbi gunna'h nin nahcu tuhbi lahdxi nin laa lihnu nee cun lahdxi culohr nin laa murahdu naxña ra' nee zucha'yi'hn cun ohru, cun garaaloh dxiah za'ca ra' cun perla ra', <sup>17</sup> ¡nee pur minuhtu si guñihchiloh cohsa za'ca ziahan ra' chi!

Garaa ra' nin rnabwa' barcu ra' cun garaa ra' nin rusazah barcu ra' nee cun garaa ru ra' nin ruhnn ra' dzi'n loh ñihsado', nee cun garaa ra' bwiinn nin rzah biahja la'n barcu; bia'han ra' ba zihtu, <sup>18</sup> ya, loh nin bwa'ha ra' ba guhxa nin caca'dxih guihtxyi chi, guza'bi rsiaa'ha-gudidxyidxiah ra' ba squii':

—¿Calla guidxeela stuhbi ziga guihtxyi roo' rii'?

<sup>19</sup> Ya bachah ra' ba yuh yihca ra' ba, nee ru'nduxa ra' ba cun riaa duxa ra' ba, ya rb-widxyidxiah ra' ba squii':

—¡Ayy! ¡Riaa duxa nu guihtxyi roo' ca laasii pur guihtxyi roo ca guhca rricu ra' nin nahpa ra' barcu loh ñihsado', yannah pur minuhtu si guñihchiloh guihtxyi roo' ca!

<sup>20</sup> Per biahxi xcweenta guihtxyi ca; yi'h dxibaa', la'htu nin naa ra' xpwiinn Dxiohs, la'htu xpooxtla xteenn Ñi'h, cun bwiinn ra' nin baluu'yi xchi'dxyi Ñi'h desde galoh'tii'yi; laasii la'h Dxiohs bwi'hnn guelguxchisi loh guihtxyi ca tin gudxihllin garaa nin cagasa'cazii guihtxyica la'htu. <sup>21</sup> Ya la'h tuhbi xaanjla Dxiohs nin nahpa guelrnabwa' guteesa ba tuhbi dxiah, nin naa ziga zi tuhbi dxiah roo' nin ruca'dzi maan dohba ya bala'h aanjla chin loh ñihsado', chi'chi rahbi ba squii':

—Squii' za dxiaabagueeta guihtxyi Babilonia, ya nin ayi chu'tii' nin stuhbi dxyih gwa'ha tu loh guihtxyi Babilonia. <sup>22</sup> Nin stuhbitii' ayi chuu ru dxihn tu muusca xteenn arpa ra' cun bidxee ra', cun trompeta ra'; nee nin ayiru chy bwiinn nin guunn dzi'n gaapa lu'h; nee nin ayiru chuu rsiaa'ha xteenn dxiah roo' ra' nin naa ziga dxiah nin ruca'dzi maan dohba. <sup>23</sup> Nee nin stuhbi bia'ñih ayiru gaapa lu'h ya nin stuhbitii' za ayi xi lañih xteenn guelruchinaa ayiru sa'bi rsiaa'ha loh lu'h guihtxyi Babilonia, cun neezaa xpwiinn guri'xi ra' lu'h nin mahzi lasahca ra' cadxyih loh guidxyiyuh, basagui'hi lu'h garaa ra' guihtxyi ra' cun xquelbidxa'ha lu'h.

<sup>24</sup> Pwihsi loh guihtxyi ca la'h llarihn bwiinn ra' nin guñi' xchi'dxyi Dxiohs nee cun nin naa ra' xpwiinn Ñi'h, nee cun garaa ra' nin guhchi pur bwiinn loh guidxyiyuh; la'h llarihn ra' ba bidxeela nuuchi lu'h laasii yi'h gudxiinn lu'h la'h ra' ba.

## 19

<sup>1</sup> Chin guluhlla ra' cohsa ra' rii', chi'chi biindx-iaagahn rsiaa'ha ziga ziahan roo' ra' bwiinn nin

cañi' nez llaa'ndxibaa' squii':

¡Lasahca duxa naa lah Daada Dxiohs!

Cun ziga ruta'h Ñi'h la'h ra' bwiinn loh duhlda,  
cun guelña'ñih, cun guelrnabwa' naa  
xteenn Xtaada Dxiohs nu'h,

<sup>2</sup> laasii xquelguxchisi Ñi'h naa gaduhbi la'ga'htii'  
ziga naa xnehza;

laasii la'h Ñi'h bwi'hnn guelguxchisi xcweenta  
gunna'h dxaaba nin cagaxi'n la'h ra' bwi-  
inn guidxyiyuh cun xcweenta xquelgub-  
wihlli ba;

la'h Ñi'h basadxihlli la'h gunna'h dxaaba chi llar-  
ihn ra' xpwiinn Ñi'h.

<sup>3</sup> Lwehgu guñi' ra' ba stuhbi squii':

—¡Lasahca duxa naa lah Daada Dxiohs!  
Laasii guhxa xteenn gunna'h dxaaba cun ziga  
zohbadxih ba ayi chuu dxih cweezan.

<sup>4</sup> Ya loh galda bitaapa ra' bwiinn guuhla  
cun gadaapa ra' maan nabahanpa'hcaa ra'  
bazu'nllihbi ra' nez loh Dxiohs nin zohba loh  
yahgaxiyyi roo' ya rahbi ra' ba squii':

—¡Zi'chi gaca! ¡Lasahca naa lah lu'h Daada Dx-  
iohs!

<sup>5</sup> Ya chi'chi desde nez loh yagaxiyyi roo' chi  
biinloh tuhbi rsiaa'ha nin cañi' squii':

¡Gulgui'hnn lasahca la'h Xchiohs nu'h, garaa tu  
nin ruhnn dzi'n nez loh Ñi'h; garaa tu nin  
ruzu'nllihbi nez loh Dxiohs;

bwiinn ra' nin rnabwa' nee cun bwiinn ra' nin ayi  
xi guelrnabwa' nahpa za!

*Lañih xteenn saa' Xi'hyi Dxiohs*

<sup>6</sup> Chi'chi biindxiaagahn ziga rsiaa'ha ziahan roo'ra' bwiinn, nee ziga bwih xteenn ziahan gui'w chin radxa'galasaa' ñihsa nee ziga bwih xteenn chin rdxí'ñaa' duxa du'guzi'w; guñi' squii':

¡Lasahca duxa naa lah Daada Dxiohs!, laasii la'h Yu'bi Dxiohs, nin naa Daada xteenn nu'h, la'h Ñi'h guzohbaloh canabwa'.

<sup>7</sup> Dxiahxi duxa ra' nu'h, chuu nasaa duxa sto' ra' nu'h nee gachidi'hnn lasahca nu'h la'h Ñi'h, laasii la'h dxyih nin gaca rsaa' Xi'hyi Dxiohs badz-ihn; la'h dxa'pa xteenn Ñi'h guzuhcha'yi.

<sup>8</sup> Ya la'h dxa'pa chi guzi'guelda Dxiohs gacu bi lahdxi nin laa linu finu, nin nayaa nin rca'bacha'h, pwihsi lahdxi linu finu naa sehn xteenn ra' dzi'n za'ca nin bwi'hnn ra' nin naa ra' xpwiinn Dxiohs.

<sup>9</sup> Ya chi'chi nnah aanjla chi loon:

—Baca'h squii': “Dichohsa ra' bwiinn ra' nin bidu'hun dxi' loh saa' xteenn Xi'hyi Dxiohs.”

Guñi' za aanjla chi loon, nnah ba:

—Dxyi'dxyi ra' rii' naa dxyi'dxyi nin naa guchii xteenn Dxiohs.

<sup>10</sup> Chi'chi ñuzu'nlliibihn loh aanjla chi, per squii' guñi' ba loon:

—¡Ayi guunn lu'h zi'ca!, laasii na'h naan ziga gahca yi'h; na'h naan tuhbi nin ruhnn xtsi'n Dxiohs, ziga naa lu'h yi'h cun bwihtsi ra' lu'h nin zezah loh dxyi'dxyi guchii xteenn Jesucristu. Mas cha'yi guzu'nllihbi lu'h loh Dxiohs; laasii xchi'dxyi Jesuhs naa dxyi'dxyi nin ruluu'yi Dxiohs la'h ra' bwiinn tin rahpaa ra' ba dxyi'dxyi guiñi' ra' ba.



*Nin dzi'ba tuhbi maangwahyi labweh*

<sup>11</sup> Chi'chi bwa'hahn billaala dxibaa', ya biinloh tuhbi maangwahyi labweh, ya nin zohba dihtsi ma laa Nin ruza'loh xchi'dxyi Ñi'h, laasii rnabwa' Ñi'h nee ruhnn Ñi'h guehrru ziga naa xnehza ziga naa guelguxchisi za'ca. <sup>12</sup> Bizloh Ñi'h naa ra'n ziga dxih bwehla, ya yihca Ñi'h zohba ziahan roo' ra' curohn, ya caa Ñi'h tuhbi lah nin sola la'h Ñi'h naann Ñi'h ya ayi chyu ruhnn gahn dxiu'nbwa' lah Ñi'h. <sup>13</sup> Nahcu Ñi'h tuhbi lahdxi nin nuuchi rihn, ya lah Ñi'h naa Xchi'dxyi Dxiohs. <sup>14</sup> Ya na'hla garaa ra' suldahdu dxibaa' xteenn Dxiohs la'h Ñi'h, nahcu ra' ba lahdxi labweh guii'w ra', lahdxi nayaa nee dzi'ba za ra' ba maangwahyi labweh ra'. <sup>15</sup> Rwa' Ñi'h care'h tuhbi spahda nin caa duxa garoopa dihtsi, tin cun la'h spahda chi childxinee Ñi'h la'h ra' bwiinn garaa ra' guiidxyi ra' nin nuu loh guidxyiyuh; naa Ñi'h nu'a ziga zi tuhbi bahra dxi'ba nguihdzi. La'h Ñi'h zuhnn za Ñi'h guelguxchisi loh ra' bwiinn ra' nin ruhnn malcriahdu nez loh Dxiohs ya zidxihchixquii' Ñi'h yihca ra' ba ziga zi uhva ra' chin rahcan vihnu, nee zuhnn Ñi'h para guti'dxiloh ra' ba loh guelguxchisi xteenn Dxiohs nin nuu nabahan dzi'tsi llaa'ndxibaa'. <sup>16</sup> Nee loh xahba Ñi'h cun cwe' cuu'dxi Ñi'h caa squii': "Rehyi xteenn ra' rrehyi ra', Daada xteenn ra' daada ra'."

<sup>17</sup> Ya bwa'hazahn loh tuhbi aanjla nin zuunchii nez loh gubihdxyi, nee guñi' aanjla chi cun tuhbi rsiaa'ha roo' squii':

—Loh ra' garaa ra' maan ra' nin zohba xihyi ñi'h nin za'bi nez llaa'ndxibaa': Gultaa' nee gulga-

diaa'ha rii', tin gahw tu loh xchih roo' xteenn Dx-iohs, <sup>18</sup> tin gahw tu bwe'hla xteenn rrehyi, neezaa bwe'hla xteenn capitahn ra', nee cun bwe'hla xteenn ra' za bwiinn ra' nin ruhnn naruhla, cun bwe'hla xteenn ra' maangwahyi nee cun nin rzo-hba za ra' dihtsi ma, neezaa bwe'hla xteenn ra' bwiinn; bwiinn nin naa ziga bwiinn nin gudoo'tii' ra' nee cun bwiinn ra' za nin ayi gudoo' ra', bwiinn nin nariin ra' cun ziga bwiinn nin guyu'xa la ra'. Gacan rwaa'lohchi'zi.

<sup>19</sup> Chi'chi bwa'ahan loh maan roo' cun loh ra' rrehyi loh guidxyiyuh cun garaa ra' nin naa ra' ziga xsuldahdu ra' ba; badiaa'ha ra' ba tin childx-inee ra' ba la'h nin dzi'ba maangwahyi labweh cun neezaa garaa ra' nin naa xsuldahdu Ñi'h, <sup>20</sup> ya bina'zu maan roo' chi cun nin guhca profeta xteenn ma nin bwi'hnn sehn roo' ra' cun milahgru ra' nez loh maan roo' chi tin bina'zunee ma tuhsi cun nin guhca xprofeta ma. Ya cun milahgru ra' chi basagui'hi profeta dxaaba chi la'h ra' bwiinn ra' nin guzi'guelhda ra' guyu' ra' ba xpwa' maan roo' chi nee cun nin bazu'nllihbi za ra' loh xfiguhra maan roo' chi; ya maan roo' chi cun nin guhca xprofeta ma tuhsi zee ra'n loh bwehla duxa nin naa asufre, <sup>21</sup> ya chi'chi la'h garaa ra' nin bia'han, guhchi ra' ba pur spahda nin biria'h rwaa' nin dzi'ba maangwahyi labweh, ya garaa ra' maan nin zohba xihyi ñi'h gudahw xpwe'hla ra' ba.

## 20

*Tuhbi mihiyiyhza*

<sup>1</sup> Chi'chi bwa'hahn loh tuhbi aanjla nin ze'yehta nez dxibaa' cun tuhbi chiahyi nin ruxaala guii'dxyu nin laa gabihldxyi naa ba. Nuu za tuhbi cadehn roo' naa aanjla chi. <sup>2</sup> Aanjla chi guna'zu ba la'h maan duxa nin laa dragohn tin biyi'bidu'h ma, la'hma nin guhca bwe'lda roo' chieempa duxa nin laa bwiinndxaaba cun Satanahs, ya bachi'bidu'h aanjla chi la'hma loh tuhbi mihiy yihza, <sup>3</sup> ya chi'chi bala'h aanjla chi la'hma gabihldxyi, tin ri'chi bie'w ma. Ya baca'h aanjla chi tuhbi sehyu rwaa' pwerta gabihldxyi, tin zi'chi ayi ru nuu gusagui'hi ma la'h ra' bwiinn guidxyiyuh ra' loh tuhbi mihiy yihza, ya loh gazaa' tuhbi mihiy yihza rii', nahpa zila'h ma zabalaaqui'hn.

<sup>4</sup> Lwehgu gahca za bwa'hahn loh yahgaxiiyi ra' nin zohba ra' bwiinn ra' nin guca'ha guelrn-abwa' tin guunn ra' ni'chi guelguxchisi, neezaa bwa'hahn xaalma ra' bwiinn ra' nin birwa'h yihca ra' ñi'h, pur nin baluu'yi ra' ba xchi'dxyi Dxiohs cun xchi'dxyi Jesucristu. La'h ra' bwiinn ra' rii' ayi bazu'nllihbi ra' ba loh maan roo' nee nin loh za figuhra xteenn maan roo' chi, nee nin ayi za basaa'n ra' ba ñuu' ra' ba bwa' xteenn maan chi locah ra' ba o yahn naa ra' ba. Bwa'hahn bwiinn ra' rii' gubia'garii babahn ra' ba ya gunabwa' ra' ba tuhsi cun Jesucristu loh tuhbi mihiy yihza. <sup>5</sup> Per snuhn ra' bwiinn nin guhchi ayi babahn ra' ba chin bacwa'hn Dxiohs la'h ra' bwiinn ra' rii', sino que hasta chin gazaa'yi tuhbi mihiy yihza ra' rii'. <sup>6</sup> Dichohsa nee saantu naa ra' bwiinn ra' nin gabahan ra' loh mwerloh nin gabahan ra' bwiinn laasii naa ra' ba bwiinn nin ayi ru xtuhlda ra' ñi'h

ni'chin nin raroopa guelguhchi ayi nahpa guelrn-abwa' xcweenta ra' ba, sino que mas gaca ra' ba xpixohza Dxiohs nee cun xpixohza za Jesucristu, nee zinabwa'nee ra' ba la'h Jesucristu loh tuhbi mihi yihza.

<sup>7</sup> Ya chin gazaa' tuhbi mihi yihza chi, zila'h bwiinndxaaba gabihldxyi, <sup>8</sup> chi'chi zusagui'hi ba la'h ra' bwiinn guihtxyi ra' nin rii ra' loh gadaapa lahdu loh guidxyiyuh; zusagui'hi ba la'h ra' bwiinn guihtxyi Gog cun bwiinn Magog, ya zutiaa'ha ba la'h ra' bwiinn ra' chi tin gaca bwiinn ra' chi xsuldahdu ba para loh guehrru, ya naa ra' ba ziga zi yuhlli nin rii rwa' ñihsado' gaca ziahan ra' ba. <sup>9</sup> Tin zi'chi babi'hi ra' ba nez gaduhbi loh yuh ra' nez chi, tin bata'w naa ra' ba hasta rii ra' xpwiinn Dxiohs nee cun hasta naa za guihtxyi nin ruca' sto' Dxiohs, per Dxiohs guxe'hla Ñi'h dxih nin dxiinloh nez llaa'ndxibaa' nin guñihchiloh la'h ra' dee' ra'. <sup>10</sup> Ya bwiinndxaaba nin basagui'hi la'h ra' bwiinn guna'zu neezaa ba zee ra' ba loh dxih nin cayahca cun nin laa asufre, hasta zee za maan roo' cun profeta xihn xteenn ma; ri'chi guti'dxiloh ra' dee' ra' guelrza'cazii duxa dxyih-nague'la para tu'pazi.

### *Jwisi nin gaca nez loh yagaxiyyi labweh*

<sup>11</sup> Chi'chi bwa'hahn tuhbi yagaxiyyi guroo' roo' nin naa culohr labweh nee cun nin zohba za loh yagaxiyyi chi, ya nez delaanta loh Ñi'h guñihchiloh guidxyiyuh cun dxibaa', ya ayiru bidxeela nin tuhbi lahta para la'h ra'n. <sup>12</sup> Bwa'hazahn loh ra' bwiinn guuchi ziga nin lasahca cun nin ayi

lasahca; zuu ra' ba nez loh Dxiohs, chi'chi bil-laala loh chihbru ra' nee cun neezaa loh stuhbi chihbru xteenn Dxiohs nin laa chihbru guelnabahan nin naa para tu'pazi. Ya chi'chi bwi'hnn Ñi'h guelguxchisi xcweenta ra' bwiinn guuchi ra' chi pur dzi'n nin bwi'hnn tuhbigah ra' ba, ziga naa xcweenta tuhbigah ra' ba nin caa loh dxihtsi ra' chi. <sup>13</sup> Ñihsado' biu'n nan ntriehgu bwiinn nin guhchi lohon, guelguhchi, nee lahta xteenn guelguhchi batsiiga la'h ra' bwiinn guuchi nin guyuu' loh ra'n loh Dxiohs. Ya chi'chi bwi'hnn Dxiohs guelguxchisi xcweenta tuhbigah ra' ba pur ziga cada bwi'hnn tuhbigah ra' ba. <sup>14</sup> Ya seguihdu guelguhchi cun lahta hasta naa xteenn guelguhchi, zee ra'n loh bwehla duxa, ya loh bwehla duxa rii' naa guelguhchi nin raroopa, <sup>15</sup> ya loh bwehla za chi zee ra' bwiinn ra' nin ayi caa lah ra' ñi'h loh chihbru nin laa guelnabahan.

## 21

### *Llaa'ndxibaa' cuubi cun loh guidxyiyuh cuubi*

<sup>1</sup> Ya seguihdu bwa'hahn tuhbi llaa'ndxibaa' cuubi cun tuhbi guidxyiyuh cuubi, laasii la'h dxibaa' galoh cun guidxyiyuh galoh la'h ra'n guñihchiloh, ya ayi ru za ñihsado'. <sup>2</sup> Na'h Jwahn bwa'haloon guihtxyi Jerusalehn cuubi; bwa'hahn guihtxyi saantu chi ze'yehtan nez dxibaa' hasta rnabwa' Dxiohs. Zucha'yin ziga zi rzuhcha'yi tuhbi dxa'pa nin rahlda ruchinaa. <sup>3</sup> Chi'chi bihna'hn tuhbi rsiaa'ha roo' nin guñi' nez dxibaa' hasta zuu yah-gaxiyyi roo', squii' cañi'n:

—Gulguia'ha nnah la'h Dxiohs zuu galaayi ra' bwiinn, la'h Dxiohs nabahanee la'h ra' bwiinn,

ya la'h ra' ba gaca xpwiinn Ñi'h, ya la'hgahca Yu'bi Dxiohs guibahanee la'h ra' ba tin gaca Ñi'h Xchiohs ra' ba, <sup>4</sup> laasii ziñihchiloh guelguhchi, ayi ru chuu guelnalaasa sto' nin guelnayaan, laasii garaa ra' dee' ra' nin guyuu' galoh la'h ra'n guñihchiloh.

<sup>5</sup> Ya chi'chi la'h nin zohba loh yahgaxiayi roo' nez dxibaa' guñi' loon squii':

—Bwa'ha, na'h guunn nacuu'bihn garaatii'.

Guñi' za Ñi'h loon squii':

—Baca'h dxyi'dxyi ra' rii' laasii dxyi'dxyi ra' rii' guchii pa' ca naa ra'n; zahca chechii sto' ra' bwiinn dxyi'dxyi ra' rii'.

<sup>6</sup> Chi'chi nnah za Ñi'h loon squii':

—La'n guya'loh; na'h naan nin rbahchixchih nee na'h za naan ziga nin ruza'loh ziga zi lehtra A cun Z. Bwiinn nin rdxahga ñihsa; na'h gudi'hihn ñihsa nin rudi'hi guelnabahan guee ba, sin nin ayi chiilli ba nin tuhbi ga'yu. <sup>7</sup> Bwiinn ra' nin guunn gahn loh duhlda, bwiinn ra' chi guica'ha garaa ra' dee ra' ziga zi tuhbi herensi; ya na'h gaca'hn Xchiohs ra' ba ya la'h ra' ba gaca ra' llii'nahn, <sup>8</sup> per ya ziga la'h ra' bwiinn ra' nin nadxyi'bi, nin ayi riachii sto' ra' ñi'h xchi'dxyi'hn, nin rdxyi'chinee xchi'dxyi'hn, nin rdxiiinn ra' bwiinn, nin nabahan ra' loh guelgubwihlli, nin rusi'dxi ra' guelbidxa'ha, nin ruzu'nllihbi ra' nezloh ra' dxaan, nee garaa ra' nin ruu'yi dxixi'hw; garaa ra' dee ra' guzee loh bwehla nin naa cun nin laa asufre, dee na guelguhchi raroopa.

*Guihdxyi Jerusalehn nacuubi*

<sup>9</sup> Ya chi'chi bwa'hahn loh ra' tuhbi aanjla nin naa gahdzi ra' aanjla nin ca'ha gagaadzii ra' cohpa nin nuu ra' luulchima guelguxchisi xteenn Dxiohs, ya squii' guñi' ba loon:

—Rii' gudaa', tin gulu'yi'hn yi'h dxa'pa nin guchinaa Lli'hyi xteenn Dxiohs.

<sup>10</sup> Ya loh bihsi nin bani'hi Spíritu Saantu na'h bwa'hahn, gwanee Ñi'h na'h yihca tuhbi dahan roo', ya yihca dahan chi dxuu nu chin baluu'yi Ñi'h na'h guiidxyi saanto Jerusalehn nin ze'yehta nez llaa'ndxibaa', nez delaanta loh Dxiohs. <sup>11</sup> Guiidxyi Jerusalehn rii' rñah rca'bacha'han cun xquelbacha'h roo' xteenn Dxiohs, ya guelrca'bacha'h xteenn Jerusalehn cuubi rii' rñahan ziga zi guelrbacha'h xteenn tuhbi dxiah nin chuhla duxa, ziga dxiah nin laa jaspe nin rñah ziga cristal. <sup>12</sup> Ya gadiidxi guiidxyi Jerusalehn chi nuu tuhbi barda nin naa altu roo', nee nuu za tsi'h bichiohpaza ziga rwaa' yuu' nuu barda chi, ya zuu tuhbigah ra' aanjla cada ra' rwaa' yuu' chi; ya la'h ra' gadzi'h bichiohpa cwa'h xpwiinn ra' guehtu Israel caa rwaa' tuhbigah ra' yuu' chi. <sup>13</sup> Chohnna rwaa' lee' chi zohba nez lahdu rtahn gubihdxyi, schohnnan nez lahdu dahan dxiaa', schohnnan nez lahdu dahan gueeta, nee schohnnan nez lahdu ria'zi gubihdxyi. <sup>14</sup> Ñaa' baarda chi nuu tsi'h bichiohpa dxiah nin naa simientu, ya tuhbigah ra' dxiah chi caa lah tuhbigah ra' pooxtla xteenn Lli'hyi xteenn Dxiohs.

<sup>15</sup> Aanjla nin cañi'nee na'h nuu tuhbi bahra ohro nin naa ziga ñihta naa ba tin gudi'xi ba gui-

hdxyi Jerusalehn chi balaaca chi'h nuu xpwerta ra'n cun barda nin nuu gadiidxin. <sup>16</sup> Ya guihdxyi chi forma cwadrahdu naan; gadaapa xlahdun tuhsi madxihdu naa ra'n, ya badi'xi aanjla chi cun ñihta nin nuu naa ba, ya chiohpa mihiy chiohpa gaywa'h kilómetru naa guihdxyi chi; de largun cun de anchun cun de altuhran tuhsi madxihdu naa ra'n. <sup>17</sup> Lwehgu badi'xi aanjla chi barda nin nuu gadiidxi guihdxyi chi ya nuu'hun sesenta y cuatro metru ra' ziga naa xmadxihdu ra' bwi-inn, madxihdu chi na'zu aanjla chi nuugadi'xi ba. <sup>18</sup> Baarda chi naan cun dxiah ra' nin laa jaspe, ya guihdxyi chi naa ganaalla ohru, naan ziga bihdru nayaa. <sup>19</sup> Dxiah ra' nin naa ra' simientu zucha'yi ra'n cun garaaloh ra' dxiah joosca ra'; ziga mwer dxiah nin laa jaspe, nin raroopa cun dxiah nin laa zafiru, nin riohna dxiah nin laa ágata, nin radahpa dxiah nin laa esmeralda. <sup>20</sup> Nin rahca ga'yu dxiah nin laa ónice, nin rahca xo'pa cun dxiah nin laa cornalina, nin rahca gahdzi cun dxiah nin laa crisólito, nin rahca xuhnna cun dxiah nin laa berilo, nin rahca ga' cun dxiah nin laa topacio, nin rahca tsi'h cun dxiah nin laa crisoprasa, ya nin rahca tsi'h bituhbi dxiah nin laa jacinto, ya nin rahca tsi'h bichiohpa cun dxiah nin laa amatista. <sup>21</sup> Ya rwaa' pwerta xteenn guihdxyi chi naa tsi'h bichiohpa perla ra' tuhbigah ra' rwaa' pwerta chi naa cun tuhbigah ra' perla ra', ya loh neziuh xteenn guihdxyi chi naa ganaalla ohro; rñahan ziga bihdru. <sup>22</sup> Ayi bwa'hahn nin tuhbi guido' loh guihdxyi chi, laasii la'h Daada Dxiohs nin nahpa guelrnabwa' naa xquido' guihdxyi chi cun neezaa Lli'hyi xteenn Ñi'h. <sup>23</sup> Guihdxyi chi ayi rchi'hn



gubihdxyi cun bwe'hw laasii xpia'ñih gahca Dxiohs ruzia'ñih ri'chi, ya Lli'hyi xteenn Ñi'h naa bia'ñih loh guihdxyi chi. <sup>24</sup> Bwiinn guidxyiyuh ra' nin gwachii sto' ra' ñi'h xchi'dxyi Dxiohs ziah ra' ba loh xquelña'ñih xteenn guihdxyi chi, ya rrehyi ra' nin ze' nez loh guidxyiyuh zadzihnnnee ra' ba xquelrnabwa' ra' ba cun nee xquel lasahca ra' ba loh guihdxyi chi. <sup>25</sup> Ya rwaa' xteenn guihdxyi chi ayi dxie'wtii' ra'n radxyii nee ayi chuutii' gue'la ri'chi. <sup>26</sup> Ri'chi chenee za ra' ba guelnaza'ca, nee cun neezaa guel lasahca xteenn ra' guihdxyi roo' ra' nin guyuu' loh guidxyiyuh. <sup>27</sup> Ya ayi chuu nin tuhbi ra' bwiinn nin ruhnn dzi'n dxaaba ra' ri'chi; sola chuu ra' bwiinn ra' nin caa lah ra' ñi'h loh chihbru nin naa guelnabahan nin nahpa Lli'hyi xteenn Dxiohs.

## 22

<sup>1</sup> Ya chi'chi baluu'yi aanjla chi na'h tuhbi gui'w nayaa, hasta nuu ñihsa nin runi'hi guelnabahan. Ña'ñihin ziga zi bihdru nin laa cristal, caria'han nez loh yahgaxiyyi hasta rnabwa' Dxiohs cun Lli'hyi xteenn Ñi'h. <sup>2</sup> Galaayi neziuh roo' xteenn guihdxyi chi cun garoopa lahdu rwaa' gui'w chi guroo' yahga ra' nin runi'hi guelnabahan, nin rcah ñinahxi loh ra' ñi'h tsi'h bichiohpa cwa'h loh tuhbi yihza, tuhbigah bwe'hw ni'chi rcah ñinahxi loon. Ya batahga xteenn yahga ra' chi rallu'yi para gusiaacan la'h ra' bwiinn guidxyiyuh. <sup>3</sup> Ayi ru chuu cohsa duhlada ra' loh guihdxyi chi. Yahgaxiyyi xteenn Dxiohs cun xteenn Xi'hyi Ñi'h chuu loh guihdxyi chi, nee cun sola za la'h ra' xpwiinn Ñi'h chuu loh guihdxyi chi, nee cun sola za la'h

ra' xpwiinn Ñi'h nin guzu'nllihbi nez loh Ñi'h nee gaann ra' ba la'h Ñi'h. <sup>4</sup> Zwa'ha loh ra' ba loh Ñi'h gahxu gah ya zica'h za lah Ñi'h locah ra' ba. <sup>5</sup> Ri'chi ayi ru chuu gue'la, ya bwiinn ra' nin chuu ra' ri'chi ayiru guichi'hñ ra' ba bia'ñih xteenn ra' lámpara, nin lla'ñih xteenn gubihdxyi, laasii la'h Yu'bi Dxiohs guzia'ñih Ñi'h yihca ra' ba ya zinabwa'nee ra' xpwiinn Ñi'h la'h Ñi'h para tu'pazi.

*La'ze'gadzihn gahxu dxyih nin dxi' Jesucristu*

<sup>6</sup> Chi'chi nnah aanjla chi loon squii':

—Dxyi'dxyi ra' rii' guchii ra' pa'h naa ra'n, nee zahca chechii sto' ra' lu'hn. Daada Dxiohs gahca gusañi' lasto' ra' bwiinn nin rñi' xchi'dxyi Ñi'h; la'gahca Ñi'h baxe'hla Ñi'h xaanjla Ñi'h tin baluu'yiloh Ñi'h loh ra' xpwiinn Ñi'h cuun cohsa ra' nin gue'du ze'yaahldaa gaca. <sup>7</sup> ¡La'h guyohbagah dxie'ldahn! ¡Dichohsa ra' bwiinn ra' nin ruzo'badxiahga xchi'dxyi Dxiohs nin caa loh dxihtsi rii'!

<sup>8</sup> Na'h Jwahn biindxiaagahn nee bwa'haloon cohsa ra' rii', ya chin biindxiaagahn nee bwa'ha ra'n cohsa ra' rii', chi'chi bazu'nllibihn nez ñaa' aanjla nin baluu'yi garaa ra' cohsa ra' rii' na'h tin ñaa'nnahn la'h aanjla chi, <sup>9</sup> per chi'chi guñi' aanjla chi loon squii':

—¡Ayi guunn lu'h ni'ca!; pwihsi na'h naan tuhbi xmooza Dxiohs la'hgahca ziga naa lu'h cun garaa ra' bwihtsi ra' lu'h nin rñi' za xcweenta xchi'dxyi Dxiohs, nee cun garaa ra' bwiinn ra' nin ruzo'badixahga dxyi'dxyi nin caa loh dxihtsi rii'. Guunn la'h Dxiohs si.

<sup>10</sup> Neezaa guñi' aanjla chi loon squii':

—Ayi cuula'n lu'h xchi'dxyi Dxiohs nin caa loh chihbru rii', laasii la'h dxyih badzihn gaxxu cha'loh garaa ra' nin rñi' loh dxihtsi rii'. <sup>11</sup> Ya loh nin ria'dxi gadzihn dxyih chi, basaa'n nin ruhnn dzi'n dxaaba zuu zeezah ba loh dzi'n dxaaba, zi'chi za nin ruhnn dzi'n dxiimma zuu zeezah ba loh loh dzi'n dxiimma, ya ziga nin zeezahnee dzi'n za'ca cheezah ba loh dzi'n za'ca nin cayuhnn ba, nin naa za bwiinn nayaa zi'chi za chezahru ba gaca nayaa ba nez loh Dxiohs.

<sup>12</sup> Nah za ba loon:

—Zi'chi la'h guyohbagah dxie'ldahn; nee dxie'ldane'hn cohsa za'ca nin gudi'hihn la'h tuhbigah ra' bwiinn ziga chi'h biga'ha bwi'hnn ra' ba. <sup>13</sup> Na'h naan nin rbachixchih nee cun nin rutu'llatii' ziga zi lehtra A cun Z.

<sup>14</sup> Dichohsa ra' bwiinn ra' nin riidxi'bi ra' xahba ra' Ñi'h, tin gapa ra' ba derehchu loh yahga nin rudi'hi guelnabahan, nee zi'chi za zahca chu'tii ra' ba ba nez rwaa' yuu' xteenn guihdxyi Jerusalehn nacuubi. <sup>15</sup> Ya ziga bwiinn ra' nin naa ra' ziga bwehcu, zia'han ra' ba nez dihtsi yuu' xteenn guihdxyi chi, cun ziga ra' nin naa bidxa'ha, nin nabahan gubwihlli ra', nin rdxiiinn ra' bwiinn, nin ruzu'nllihbi ra' loh dxaan ra', nee cun garaa ra' za nin rusi'dxi xcweenta guelrusagui'hi.

<sup>16</sup> Na'h Jesuhs, baxe'hla'hn tuhbi xaanjla'hn loh tu tin baluu'yi ba dxyi'dxyi ra' rii' loh tu, ziga naa tu xpwiinn guido'n, Na'h naan lla'ha guehtu rrehyi Davi'hd, nee naa zahn dxih nin ruzia'ñih rsiiyi.

<sup>17</sup> Spíritu Saantu Dxiohs cun dxa'pa xteenn Lli'hyi xteenn Dxiohs rñi' ra' squii':

—Gudaa'.

Ya nin rihndxiahga za guiñi' ra' ba:

—Gudaa'.

Ya nin rdxahga ñihsa, nee xclaa'dzi ba guee ban, dxi' ba tin guee ba ñihsa nin rudi'hi guelnabahan, nee sin nin tuhbi ga'yu ayi guunn ba gaxtu.

<sup>18</sup> Garaa ra' bwiinn ra' nin rihn xchi'dxyi Dxiohs nin caa loh dxihtsi rii'; rñi'n loh ra' ba squii': Sidela chyulla gudzii'ba ru yihca dxyi'dxyi ra' nin caa loh dxihtsi rii', Dxiohs gudzii'ba ziahan ru guelrusa'cazii ra' nin rñi' loh dxihtsi rii' yihca bwiinn chi; <sup>19</sup> ya sidela chyulla guzia'tii yihca xchi'dxyi Dxiohs nin caa loh dxihtsi rii', Dxiohs zura'h Ñi'h lah ba loh chihbru nin naa guelnabahan, neezaa xcweenta ba loh guihdxyi saanto roo' nin caa xcweenta ñi'h loh dxihtsi rii'.

<sup>20</sup> Nin lu'h cagaluu'yi dxyi'dxyi xcweenta garaa ra' dee' guñi' Ñi'h nnah Ñi'h:

—Zi'chi, la'n guyohbagah dxie'ldahn.

Zi'chi gaca pwihsi. ¡Gudaa' Daada Jesucristu!

<sup>21</sup> La'h Daada Jesucristu xteenn nu'h guunnta'yi yihca garaa tu. Zi'chi gaca pwihsi.

**Xchi'dxyi cuubi dxiohs nin bie'galuu'yi daada  
Jesucristu (El Nuevo Testamento en el  
zapoteco de Chichicapan y en español)  
New Testament in Zapotec, Chichicapan  
(MX:zpv:Zapotec, Chichicapan)**

copyright © 1990 Wycliffe Bible Translators, Inc.

Language: Zapotec, Chichicapan

Translation by: Wycliffe Bible Translators, Inc.

Zapoteco, Chichicapan [zpv], Mexico

**Copyright Information**

© 1990, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Chichicapan

**© 1990, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022

f751ae13-0cd1-54fd-8c16-86718fb9cd5b